

# Lisilimet

## Lisilimet At Ne Jon

Levelinga Loklox Axasep

Lumaares 95-96 A.D.

Melemu at lanmet at ne Iesu la luruturut teren uto vana at laxalibet lavanna sangaun koplavanna sangaun mi lavalimo lenmaares ga men pe i la ne Jon ga malagan i na lovoang ti lotu. Jon ga vara i do mo lotu na lolos tinotno, mila limixin munepen diga lox asongot limixin at ne Moroa mumu levereven kisip atdi ri ne Iesu Karisito i ngan Leeme Silok. I se ne Jon ga nemen at loxokoxo to at losoxan Patimos, Moroa ga lox i xusu na ven lisilimet la ga lox ase i mi lempanga salai ba vot melemu. Keneng ap mo lisilimet Iesu ga vas asi lololos at ne Satan mi mo lentaba lavamunepen bok teren; la ga lox ase ne Jon do nedik ua ata nuunu at ne Iesu ataba nemen to vana at laxalibet.

**Lengkot silok keneng at na lovoang:**

1:1-8 Jon ga lox aonon lavapaase momo ren ti limixin.  
1:9-3:22 Jon ga ven Leeme Silok keneng at lisilimet.  
4:1-8:1 Jon ga ven levenmumuat mo naba vot.  
8:2-11:19 Jon ga ven lavanuti levenangelo.  
12:1-13:18 Satan la luradi vapaase ren diga ravasu.  
17:1-20:10 Moroa naba lok li ne Satan at laxao.  
20:11-16 Laaleng ete.  
21:1-22:21 Laxalibet maxat mi lavatbung menemen maxat.

---

**Lavapaase Axasep**

**1** <sup>1</sup>Ana lovoang, ni lisilimet boro at ne Iesu Karisito, ne Moroa ga raba i min, kusu na lox ase lavasaxaruki ren mi lempanga salai mo naba vot soso mun. La ne Iesu ga riki laangelo ren kusu na vaase axasev i ri ne Jon, lasaxaruki ren, <sup>2</sup>la neni naba tong asu mo lempanga axap ni ga

ven i. La anai, ni levelinga boro at ne Moroa, la mumu bok mo levelinga ruturun ne Iesu Karisito ga vaase i. <sup>3</sup>Luvukat ti mo laradi do na us na levempapaase alii, la luvukat bok tinedi di rongga na levelinga, la di mu asu levelinga ik lok keneng at na lovoang; mila levenaleng ira auret pam ti na lempanga naba vot.

### Lavapaase Momo

<sup>4</sup>Nenia ne Jon, a malagan na levelinga tinemi lavanuti leventaugu lotu mik lok at lenep silok Asia.

Letaba nabalamu la lenmila at ne Moroa nak lox eburu minimi. Neni ga nemen gano, i nemen lingina la naba vot bok melemu. La lavapaase momo bok tinemi boro at lavanuti leventoonan, mo di tu to melamgo at loxonin orong at ne Moroa, <sup>5</sup>la lavapaase momo bok boro at ne Iesu Karisito, neni laradi ruturun at lavapaase ruturun la neni lara avot mo ne Moroa ga lox axatu kaxat amlong i basinge lanmet, la ni lamgomgo at lavaorong silok at na lavatbung menemen.

Ne Iesu ga balamu nedik la ga lox asepmus dik basinge laxakapmek mi mo lada ren. <sup>6</sup>La ga lok li nedik ngan lavamaasa at Linintoo ren, kusu dik tana lok lugugu at ne Moroa, ne Temen. Ata emi asu mi ne Iesu, lisisixam mi lololos axap teren; neni naba nemen amisik. I ruturun. <sup>7</sup>Mina ven avukat tin. Neni mo naba vot eburu mi loxontakabu, la larabung mixin axap eburu minedi diga vaxarem i at laxaba, dinaba ven i. La limixin axap at na lavatbung menemen dinaba saxaanu mu bok ba i. La nai naba ravasu ruturun kuren. I ruturun.

<sup>8</sup>Morua Leeme Silok atdik ga lok keretna, “Nenia mun Lurutu Kaxat la Lumumupit at lempanga axap. Nia aga nemen gano, a nemen lingina, la anaba vot bok melemu. Nenia a lolos aleng.”

### Levelinga Ri Ne Jon

<sup>9</sup>Nenia ne Jon, neton nemi limixin mi nuunu at ne Iesu. La nenia na ap kip levesongsongot eburu minimi, la nedik eburu lavaanat at Linintoo ren, la ata tu tuxuruxun at lunuunu atdik, do nedik ata ekip tangarang mi levesongsongot.

Nenia agak lok at losoxan to Patimos, nia aga nemen go ngan laradi xokoxo mila nia aga tong asu Lagale Lavavang at ne Moroa mi levelinga ruturun at ne Iesu. <sup>10</sup>At lara laaleng, ni laaleng at Leeme Silok, Loroonan at ne Moroa ga suxuna ia, la aga silimet tang ka ne Iesu. La keneng at na lisilimet, aga rongga laxaka linga silok to melemu rak, gang teng ngan lurus. <sup>11</sup>La mo laxaka linga ga lok, “Una lok kaka lugun la una malagan asu na lempanga nenu uba ven i; la una lox aonon i uto at lavanuti leventaugu lotu, tara uto Epesas, la tara uto Smena, la tara uto Pegamam, la tara uto Taiataira, la tara uto Sadis, la tara uto Piladelpia, la tara bok uto Lodisia.”

<sup>12</sup>Aga rem gili kusu ana ven i do nege mo laradi ga paase ria, la aga ven lavanuti levenbabao gol gak lok. <sup>13</sup>La kantubu at nom levenbabao lara laradi ga tu go, neni ga lok ngan Laradi Mevana, ga sigaara mi lavanga singsiga baalom, la loxontamon tantanan ga is korop lobongobong teren min. <sup>14</sup>La lavatlak teren eburu mi levengekabinim teren gan bun aleng tinotno, ga ngan lovopaxanao i sovosok; la luxatli ren ga babao ngan laxao bokbolot. <sup>15</sup>La luxangkedek teren ga ngangao ngan loxonuat, no laxao i an amemeles i la laxaka linga ren ga reng ngan lenaonkaka at ladan it los ukopok. <sup>16</sup>At lekngen tino, neni gam tebeng lavanuti larapenti, la to at lungusno lavarise sepsep ga anan evan gak lok teren. La lemeren ga lok ngan laxangking i soosoo bobonot mi lololos teren.

<sup>17</sup>Se nia aga ven i, aga subu saporap luxangkedek teren la nia aga met aroo. Ketla ni ga sogo tu rak mi lekngen tino, la ni ga lok tia, “Nemen gat uta marat. Nenia mun Lurutu Kaxat la Lumumupit. <sup>18</sup>Nenia mun lorooro. Aga met pam, ketla na nga a ruuna ka lorooro kopmen taxavaxap teren. La a ruuna bok lololos mavana at lanmet kusu ana suang lumusaragu at lanmet, la a ruuna lololos mavana at lanmet la a lok tatao lumusaragu ro Edesa.

<sup>19</sup>Kuren la una malagan asu lempanga salai u ven pam i la lempanga salai mo naba vot melemu. <sup>20</sup>Levelinga alipe at lavasuun at lavanuti larapenti nenu u ven i de at lakngak tino, di lok katling lavanuti nedi lubung angelo dik lok tatao mo lavanuti leventaugu lotu. La lavanuti levenbabao gol, di ru katling nom lavanuti leventaugu lotu.”

### Lempapaase Uto Saporap Limixin Lotu Ro Epesas

**2** <sup>1</sup>Leeme Silok ga lok bok tia, “Una malagan na levelinga ti laangelo ik lok tatao limixin lotu ro Epesas.

‘Na levelinga boro ap mo lara im tebeng lavanuti larapenti at lekngen tino la neni it pas kantubu at lavanuti levenbabao gol. <sup>2</sup>Akleklen lorooro atnimi, la aklen bok leven gugu lolos atnimi la aklen i do mi tu lolos kantubu at levesongsongot mo nemi mip kiv i. Aklen box i do mixo esuxun mi limixin kapmek, la mira lok tong pen pam nedi di lok do nedi mo luvuttadi vavang, ketla mira long lenget ka i do nedi limixin kaxarang. <sup>3</sup>Aklen i do nemi mira tu tuxuruxun pam at lunuunu atnimi, la migap kip levesongsongot mi lomomo, mo levesongsongot mumu laasen tarak, la mixo molo xape lunuunu atnimi.

<sup>4</sup>Ketla a ruuna na lempapaase mumu nemi at lempanga miga lox i, kopmen na lox avukat; labalamu atnimi ria kopmen na lolos kerekngan miga balamu avor ia at laaleng miga ravasu ngan limixin nuunu. <sup>5</sup>Mina doma bilong ti mo labalamu avot atnimi ria, kusu miba ven kibis i do mira subu vam basinge ia. La mina leeng tinotno la minamlong ti mo

leveloklok nunuan nemi miga lox avor i. Mo do mi noxo leeng, aba vot saparap nemi la ana lok kepe nom lababao atnimi. <sup>6</sup>Ketla lara lavanga mo, nia a lok momo minimi ren, mila mi xopara aleng mo leveloklok kakapmek atnedi limixin di mumu asu ne Nikolaus. La nenia bok axo vara rino mo loklok.

<sup>7</sup>Do tara i ruuna lubaalung, i lox avukat do neni na ronga na levelinga at Loroonan at ne Moroa i tong asu i ri limixin lotu. Do tara i tu tuxuruxun la it pas asi lololos at laxapmek, aba lox epovo i rin kusu ni na anan at levenpeven at luuna at lороoro, mo ik lok to at lagale lemenemen at ne Moroa.”

### **Lempapaase Uto Saparap Limixin Lotu To Smena**

<sup>8</sup>Leeme Silok ga lok bok tia, “Una malagan na levelinga ri laangelo ik lok tatao limixin lotu to Smena.

‘Anai ni levelinga ap mo lara neni Lurutu Kaxat la Lumumupit, mo ga met ketla gara roo xat amlong pam. <sup>9</sup>Aklen levesongsongot nemi mip kiv i, la aklen i do mit kis pakpakes, ketla nemi mip novos aleng mi lempanga boro vana at laxalibet. Aklen levelinga xaxarang atnedi limixin di tong i rinimi do nedi me Judaia, ketla kopmen, nedi mun limixin lotu at ne Satan. <sup>10</sup>Nemen mita marat ap mo levenmumuat minabap kiv i. Mina ronga i na, Satan naba lok li teventaba atnemi ri loklok tong, la ba lok li teventaba atnimi at loxokoxo; la mibap kip mo levesongsongot at lasangaun aleng mun. Mina tu lolos mi lunuunu atnimi saparav ia, keke i do miba met mumu i, la aba raba nemi mi lороoro avolo ngan lavatbungorong tinimi.

<sup>11</sup>Do tara i ruuna lubaalung, i lox avukat do neni na ronga levelinga at Loroonan at ne Moroa i tong asu i ri limixin lotu. Do tara i tu lolos keneng at levenmumuat, neni noxo suma rinotno lanmet sepsev agepura.”

### **Lempapaase Uto Saparap Limixin Lotu Ro Pegamam**

<sup>12</sup>La Leeme Silok ga lok bok tia, “Una malagan na levelinga ri laangelo ik lok tatao limixin lotu ro Pegamam.

‘Anai levelinga boro ap mo laradi i ruuna lavarise sepsep i anan evan. <sup>13</sup>Akleklen i do mik lok at lemenemen, ne Satan i nemen keneng teren ngan loorong silok. Ketla laasen tarak mim tebeng alolos i. La nemi xopmen mi goxo soxepe lunuunu atnimi ap mo levenaleng ne Antipas ga uu ren; neni ga nemen ngan laradi ruturen la laradi vapaase asu levelinga rak. Limixin at ne Satan diga sev i dom kantubu at lemenemen silok atnimi, nom ne Satan i nemen teren.

<sup>14</sup>Ketla a ruuna lempapaase lixilik mun mumu nemi at lempanga mi lox i kopmen na lox avukat. Lentaba atnimi dom dim tebeng alolos levenanasa at ne Balam, mo ga lox ase ne Balak kusu na sar asoogong

limixin me Israel ti laxakapmek. Ni ga tong i ridi do dina anan leveluxa laplavang ri lempoovo moroa la ni ga sar asoogong di kusu dina lok laxakapmek maxamang at lixitkis epot. <sup>15</sup>La lentaba luvuttadi bok kantubu atnimi di mumu asu levenanasa at ne Nikolaus. <sup>16</sup>Kuren la mina leeng tinotno. Mo do mi noxo leeng, anaba vot soso mun la ana esep eburu midi mi lavarise sepsep ba ravasu mede at langasuk.

<sup>17</sup>Do tara i ruuna lubaalung, i lox avukat kusu neni na ronga na levelinga Loroonan at ne Moroa i tong asu i ri limixin lotu. Ti mo lara do i tu lolos la it pas asi amisik laxapmek, aba raba i mi leveluxa boro vana at laxalibet, laasen teren lamaana, no i nemen alipe. La aba raba box i mi luat bunbun, eburu mi laasen maxat, mo bak lok at luat bunbun. Kopmen teta naklen mo laasen, ketla mo laradi xusuk mun naba ruuna ka mo luat nabaklen i.”

### **Lempapaase Uto Saparap Limixin Lotu Ro Taiataira**

<sup>18</sup>La Leeme Silok ga lok bok, “Una malagan bok na levelinga ti laangelo ik lok tatao limixin lotu to Taiataira.

‘Anai levelinga boro at ne Nitna ne Moroa, luxatli ren i babao ngan laxao bokbolot, la luxangkedek teren i ngangao ngan loxonuat, laxao i an amemeles i. <sup>19</sup>Akleklen lorooro atnimi, la aklen bok labalamu atnimi la lunuunu atnimi, la leveloklok nunuan atnimi. Aklen levesongsongot nemi mip kiv i, la mo leveloklok nunuan atnimi at na levenaleng i buaang aleng ti mo leveloklok nunuan nemi miga lox i ap mo levenaleng miga ravasu ngan limixin nuunu.

<sup>20</sup>Ketla axo lok momo minimi mumu i na; mi siam kaka nom latkin ne Jesebel, i tong i do neni latkin papaase alii at ne Moroa, ketla neni i sar asoogong limixin tarak ti lok laxakapmek maxamang at lixitkis epot la i lok nedo kusu dina anan leveluxa diplavang min ti lempoovo moroa. <sup>21</sup>Ara tong taba vam nom latkin mi levenaleng kusu ni na leeng basinge nom loklok kakapmek, ketla i xopara. <sup>22</sup>Kuren la aba sev i mi levesongsongot silok, la nedo digang longka i, anaba lok li nedo at losongsongot silok do nedo di noxo leeng basinge leveloklok kakapmek ap mo latkin. <sup>23</sup>La aba sev amet bok laxamdak teren. La limixin axap di nuunu dibaklen i do nenia ne Penasiak, aklen lorooro at limixin axap la aba vorang laxakapmek atnemi mi levesongsongot i epovo at loklok at legetgesa radi. <sup>24</sup>Ketla lentaba limixin nuunu atnimi dom Taiataira mixo lok momo at nom laanasa at ne Jesebel. Mixo siam ka laanasa ren la miga ke xepe bok mo levenanasa mumuat di tong i do levendomdoma alipe at ne Satan. Nenia a noxo tong bok tevelinga lolos tinimi xusu mina mu asu i; <sup>25</sup>ketla na legesa vanga xusuk mun, minam tebeng lolos mo lorooro nunuan atnimi, se at lomlong tarak.

<sup>26</sup>Do tara i tu lolos la it pas asi lololos at laxapmek la i lox epovo lavavara rak se at laxavaxap at na lavatbung menemen, aba raba i mi

lololos kusu rim gomgo ridi buaang limixin at na lavatbung menemen. <sup>27</sup>I lok ngan ne Tamak ne Moroa ga raba ia mi lololos kusu nia anam gomgo ri limixin. Anai i lok ngan nom levelinga at Lovoang Kaala, i lok keretna, ‘La neni naba lolos kusu na lok tatao di mi lakdak lolos, la neni naba sep povorok nedi ngan lengkong sosopen kangka i reporok.’ *Sam 2:9*  
<sup>28</sup>La nia aba raba bok nedi limixin tarak mi lentian. <sup>29</sup>Do tara i ruuna lubaalung, i lox avukat do neni na ronga levelinga Loroonan at ne Moroa i tong asu i ri limixin lotu.”

### Lempapaase Uto Saparap Limixin Lotu Ro Sadis

**3** <sup>1</sup>La Leeme Silok ga lok bok tia, “Una malagan i na levelinga ti laangelo ik lok tatao limixin lotu ro Sadis.

‘Anai levelinga boro ap mo laradi i ruuna lavanuti leventoonan dik lok to melamgo at ne Moroa, la im tebeng lavanuti larapenti. Akleklen leveloklok atnimi; limixin di lok do mi ruuna lorooro, ketla kopmen, mi ruuna mun lanmet. <sup>2</sup>Araklen pam i do lorooro atnimi xopmen na mu asu lavavara at ne Moroa rak. Kuren la mina xatu kaxat basinge mo lanmet la mina lox alolos mo lorooro, lavanga mina met epopolo. <sup>3</sup>Mina doxoma bilong ti mo levenanasa miga ronga ka vam i, la mina mu asu i. La mina leeng tinotno basinge mo leveloklok kakapmek atnimi. Mo do mi noxo xatu kaxat basinge mo lanmet, aba vot pasa nimi ngan laradi xikip pilo, la nemi xa mi noxoklen loxonaleng potpot tarak.

<sup>4</sup>Ketla lentaba mun atnimi ro Sadis kopmen di goxo lok laxakapmek. Nedi mo diba sigaara mi levesingsiga bunbun la dinaba emu minia mila nedi mo di epovo rinotno. <sup>5</sup>La nedi di tu lolos at lunuunu atdi, nedi bok diba sigaara mi levesingsiga bunbun. Nia xopmen tinotno a noxo lok kepe levenasen atdi ro at lubuk at lorooro, ketla nia aba tong i ri ne Tamak eburu mi lubang angelo ren do nedi limixin tarak. <sup>6</sup>Do tara i ruuna lubaalung, i lox avukat do neni na ronga levelinga at Loroonan at ne Moroa i tong asu i ri limixin lotu.”

### Lempapaase Uto Saparap Limixin Lotu Ro Piladelpia

<sup>7</sup>Leeme Silok ga lok bok tia, “Una malagan na levelinga ti laangelo ik lok tatao limixin lotu dik lok ro Piladelpia.

‘Ana levelinga neni boro at laradi i melemelengan la i raturun. La neni im tebeng lengki at ne Devit, loorong silok me gano; mo lengki i susuang lumusaragu at Linintoo at ne Moroa. Mo lumusaragu neni i susuang i, kopmen tara na epovo xusu na vi pe i, la mo lumusaragu neni i vi pe i, ixo epovo do tara na suang i. <sup>8</sup>Akleklen leveloklok atnimi. Ketla mina ronga i na, ara suang taba vam nimi mi lumusaragu, la ixo epovo do tara na sat pe i. Aklen i do nemi mi ruuna lololos lixilik mene la aklen box i do nemi migang tonga res at levelinga rak, la kopmen migoxo sok tixirixes laasen

tarak. <sup>9</sup>Lentaba limixin mo di tong i do nedi me Judaia, ketla kopmen, nedi lavaanat babala la nedi limixin lotu at ne Satan. Anaba lok nedi la dina vot pasa nimi la dina xis tiktikbu mi lempatgulom atdi dom melamgo atnimi la diba tong asu i do nenia a balamu aleng tinotno nimi. <sup>10</sup>Nemi miga momo ri mumu asu levelinga rak, ga lok keretna, ‘Mina tu lolos kantubu at levenmumuat.’ Kuren la aba lok kepe nimi basinge nom levenmaares mumuat mo naba vot at na lavatbung menemen, kusu na lok tong pen limixin axap. <sup>11</sup>Anaba vot soso mun; minam tebeng alolos mo lunuunu atnimi kusu tara noxo xip pilo ka mo lempatbungorong atnimi. <sup>12</sup>Do tara na tu lolos, aba lox i ngan luxus una at loogu laplavang at ne Moroa rak, la ixo epovo rinotno do neni naba vas su basinge i. Aba malagan li laasen at ne Moroa rak teren la laasen orong bok at lemenemen silok at ne Moroa rak. Mo lemenemen silok, ni Jerusalem maxat mo naba ravasi boro vana at laxalibet basinge ne Moroa rak. La aba malagan bok laasen maxat tarak go ren. <sup>13</sup>Do tara i ruuna lubaalung, i lox avukat do neni na ronga levelinga at Loroonan at ne Moroa i tong asu i ri limixin lotu.”

### Lempapaase Uto Saparap Limixin Lotu Ro Lodisia

<sup>14</sup>La Leeme Silok ga lok bok tia xeretna, “Una malagan na levelinga ti laangelo ik lok tatao limixin lotu ro Lodisia.

‘Ana levelinga boro at ne Luruturun, ni laradi raturun i tong asu levelinga at ne Moroa la ni lamgomgo at luruntudum li at ne Moroa.

<sup>15</sup>Aklen leveloklok atnimi la aklen i do lodomdoma atnimi xopmen naplivi ri lok lugugu at ne Moroa. A vara i do lotu atnimi naplivi aleng kopla na mumudut tinotno. <sup>16</sup>Kuren la nenia anaba riki xepe nimi basinge ia mila nemi mik lok kantubu, lotu atnimi kopmen naplivi la kopmen na mumudut tinotno. <sup>17</sup>Nemi mi tong i do, ‘Nema mo map novos aleng la ma ruuna lempanga axap la maxok pakes bok ti tempanga.’

Ketla mixoklen i do nemi limixin etaba la mi baava. Nemi mi lok ngan limixin pakpakes, lengkatli atdi i main, la dik lok beleben. <sup>18</sup>Kuren la a tong lolos i na rinimi do mina un ka logol nunuan mede rak, ni logol laxao in tin pes levenbiva basinge i la imgames aleng; la kerepmo mibap novos aleng. Mina un ka bok levesingsigaara bunbun kusu miba etara pe lengkot mamangan atnimi min, kusu mi noxok lok beleben. Mina un ka bok levendan momonok kusu miba saba li i dom at lengkatli atnimi, kusu miba reven.

<sup>19</sup>Nedi nia a balamu di, a vaase aronga di la a lox aleeng di. Kuren la nemi bok mina doma avukat la mina leeng. <sup>20</sup>Mina ronga i na. A tu ro at lumusaragu la ap dipdi; la do tara i ronga xibis laxaka rak la na suang lumusaragu, aba vubeles ukeneng at loogu ren la mana anan eburu.

<sup>21</sup>Do tara na tu lolos at lunuunu ren la it pas asi lololos laxapmek, aba mulus ka i xusu ni nabat kis eburu minia ro at lixitkis orong tarak,

kerekngan ia aga sak tup mi lavamunepen tarak la na nga nia at kis eburu mi ne Tamak to at loxonin orong teren. <sup>22</sup>Do lubaalung mo at tara, i lox avukat do neni na ronga na levelinga at Loroonan at ne Moroa i tong asu i ri limixin lotu.”

#### Loxonin Orong At Ne Moroa Ro Vana At Laxalibet

**4** <sup>1</sup>Melemu at na, aga ven manga lara lisilimet; maxeneng teren aga ven lara lumusaragu ga rem suang to vana at laxalibet. La aga ronga laxaka at lara xerekngan no avot nia aga ronga i, gang teng ngan lurus; ga lok tia, ‘Ude vana u, la ana lox ase u mi lempanga naba rupot melemu at nai.’ <sup>2</sup>La soso mun Loroonan at ne Moroa ga suxuna ia, la to at laxalibet loxonin orong mo gak lok mi lara gat kis teren. <sup>3</sup>La mo laradi gat kis teren, neni ga milik ngan tinotno limikmilik at la jespa, loxonuat gamgames i memele la ga milik bok ngan lakanilian, loxonuat gamgames i memele aleng ngan lada; la laxaburi gak lok kangkan mo loxonin orong ga milik ngan la emaral, loxonuat gamgames i mamaxa. <sup>4</sup>La legepu sangaun mi lavanuet bok lengkot kitkis orong gak lok kangkan mo loxonin orong la legepu sangaun mi lavanuet loxongkulao amgomgo digat kis teren. Diga sigaara mi levesingsiga bunbun la lempatbungorong i gol gak lok to at lempatlak atnedi. <sup>5</sup>Boro at nom loxonin orong, langangao at lavanga i mam ga ravasu; aga ronga leretepaavat ga on. La to melamgo at nom loxonin lavanuti levenbabao mo ga babao; nedi lavanuti leventoonan at ne Moroa. <sup>6</sup>La to melamgo ap mo loxonin orong, lara lavanga bok mo ga milik ngan ta langsung liriong silok ga xasep aleng la ga silok ngan lavatdan kis.

La lavanuet levempanga rooro di tu kangkan amisik loxonin orong, di umsu mi laxangkatli to melamgo la to melemu bok. <sup>7</sup>Lara avot ga lok ngan la laion, lara sepsev agepura ga lok ngan lubulumaxao, lara sepsev avantun ga ruuna lamakmaran at lavatlak at laradi, la lara sepsev avanuet ga ven ngan lamalom taptava. <sup>8</sup>Ti nom lavanuet levempanga rooro dik lox amisik, nedi getgesara diga ruuna lavanna levempapa, diga umsu mi levengkatli digak lok at lengkot axap la to bok maxopok at levempapa atdi. La at levenaleng kangking la kanimin kopmen dina xap ti tong na levelinga,

‘I melemelengan, i melemelengan, i melemelengan. Neni Leeme Silok ne Moroa i lolos aleng. Ni ga nemen ganoxa la i nemen mo, la naba vot bok melemu.’

*Ais 6:3*

<sup>9</sup>La mo lavanuet levempanga rooro di tong asu amisik leemi asu la loklok ngangao la levelinga rotong avukat ti mo lara it kis amisik to at loxonin orong teren. La ni naba rooro amisik. Do dina tong i nom, <sup>10</sup>mo legepu sangaun mi lavanuet loxongkulao amgomgo dit kis tiktikbu mi lempatgulom atdi to melamgo at ne Moroa mo it kis at loxonin orong



teren la di lotu parap ne Moroa naba rooro amisik la kopmen taxavaxap teren. La di lok li lempatbungorong atdi ro melamgo at loxonin la di lok keretna,

<sup>11</sup> ‘Moroa Leeme Silok atnama, nenu xusuk mun u epovo na lok kaka leemi asu, loklok ngangao mi lololos, mila nenu uga rudum li lempanga axap; la at lavavara mun taram uga rudum li di la uga lok li di xusu dina rooro.’

### Lanasip Ga Lok Ka Lugun Linga Boro At Ne Moroa

**5** <sup>1</sup>Melemu nia aga ven lugun linga ro at lekngen tino ap mo lara gat kis to at loxonin orong. Mo lugun linga ga umsu mi levenmamalagan to melamgo la to bok melemu ren, digam lut avarang i mi lavanuti levelumlut. <sup>2</sup>La nia aga ven laangelo lolos gap kup lolos mi lususue xeretna, ‘Nege i epovo do na ba kaxat na levelumlut la na obes na lugun linga?’ <sup>3</sup>Ketla kopmen teta ro vana at laxalibet kopla ro xopok at lavatbung menemen kopla de maxopok at lavatkangka gita epovo xusu na obes mo lugun linga la gita us mo levelinga ga nemen keneng teren. <sup>4</sup>La nia agang teng aleng mila kopmen teta gita epovo xusu gita obes i nom lugun linga la ri us mo levelinga. <sup>5</sup>Melemu lara atdi luvuttadi amgomgo ga lok tia, ‘Nemen utang teng. Mo laion, ni at libibinat at ne Juda, la livisik li at ne Devit, neni ira but asi vam lavamunepen min, la neni mun i epovo ri sak korop mo lavanuti levelumlut la na obes mo lugun linga.’

<sup>6</sup>La aga ven lara Lanasip ga tu kantubu rinotno at nom loxonin orong, la mo lavanuet levempanga rooro eburu mi loxongkulao amgomgo diga tu kangkan i; Lanasip ga tu, ga ven ngan ta do limixin diga sev amet pam i. Neni ga ruuna lavanuti levengkom la lavanuti levengkatli, nedi leventoonan at ne Moroa, mo ga riki asi di ri lengkot axap at na lavatbung menemen. <sup>7</sup>La mo Lanasip gat pas la ga lok ka mo lugun linga boro at lekngen tino at ne Moroa, mo gat kis at loxonin orong. <sup>8</sup>Neni ga lok ka mo lugun linga, la nom lavanuet levempanga rooro eburu mi nom legepu sangaun mi lavanuet loxongkulao amgomgo diga xis tiktikbu mi lempatgulom atdi ro melamgo at Lanasip. Nedi getgesara digam tebeng lengkon taaleng eburu mi leventingtigon gol mo ga umsu mi levempavaxan una so mavak. Ni ga ru katling levesingising atnedi limixin at ne Moroa. <sup>9</sup>La nom lavanuet levempanga rooro eburu minedi loxongkulao amgomgo diga vixan lara loxompixan maxat, i lok keretna,

‘Nenu u epovo rinotno xusu una lok ka lugun linga la una ba kaxat kepe mo levelumlut teren mila limixin diga sev amer u; ketla uga roo xat amlong la at nom mun lada ram uga un ka amlong limixin ti ne Moroa. Nedi at levenabung mixin axap la boro bok at levempapaase vetpes, la boro bok at lenbantuxu vetpes, la boro bok at larabibinat petpes. <sup>10</sup>La uga lok katling di ngan lavamaasa at Linintoo ram kusu diba lok lugugu

at ne Moroa, la dinabam gomgo ri limixin axap at na lavatbung menemen ngan limixin amgomgo atdi.’

*Sam 98:1, Pas 19:6*

<sup>11</sup>Melemu aga milik la aga ronga buaang nedi laxanangelo, diga umsu aleng la a goxo epovo xusu ana us di. Diga tu kangkan mo loxonin orong eburu mi lavanuet levempanga rooro la loxongkulao amgomgo. <sup>12</sup>La diga vaase silok keretna,

‘Lanasip, no limixin diga sev amer i; neni i epovo rinotno xusu na ruuna ka lololos, lapnovos, lakleklen, loklok ngangao, leemi asu la leveloklox anarong.’

*1 Let 29:11*

<sup>13</sup>Melemu aga ronga leemi asu boro at lempanga axap ne Moroa ga rudum li di, nedi limixin eburu mi levempanga mi lavanuet kangkedek atdi, la nedi bok pana at laxalibet la nade xopok at lavatbung menemen la lempanga bok dik lok keneng at lebelen laxangka la lempanga dik lok at lebelen laras; diga lok,

‘Ti mo lara it kis at loxonin orong la ti Lanasip bok, ma raba numu mi leveloklox anarong, loklok ngangao, leemi asu la lololos ba nemen amisik la kopmen taxavaxap teren.’

*1 Let 29:11*

<sup>14</sup>La mo lavanuet levempanga rooro diga lok, ‘I ruturun.’ La mo loxongkulao amgomgo diga xis tiktikbu mi lempatgulom atdi la diga lotu parap ne Moroa eburu mi Lanasip.

### Lanasip Ga Ba Kaxat Kepe Levelumlut At Lugun Linga

**6** <sup>1</sup>Melemu aga ven Lanasip ga ba kaxat kepe lumlut avot at nom lavanuti levelumlut, la aga ronga lara atnedi lavanuet levempanga rooro ga vaase silok ngan leretepaavat ga lok ti lara, “Ude u.” <sup>2</sup>La nia aga milik kaxat la aga ven lavaros bunbun, la mo laradi gat kis teren, neni gam tebeng labanara; la ni ga lok ka lavatbungorong, la ni ga sixit kaxat uto at lengkot axap at na lavatbung menemen ngan ta laradi esep kusu na sev asi lavamunepen teren.

<sup>3</sup>La melemu Lanasip ga ba kaxat kepe manga levelumlut sepsev agepura; la aga ronga lavanga rooro sepsev agepura ga lok ti lara, “Ude u.” <sup>4</sup>La lara lavaros manga ga vas su, ga memele aleng. La mo laradi gat kis teren, ga lok ka lololos kusu na lok kepe lumulum kantubu at limixin at na lavatbung menemen, kusu limixin diba esev amet. La neni ga lok ka bok lavarise sepsep i baalom aleng.

<sup>5</sup>La melemu Lanasip ga ba kaxat kepe manga levelumlut sepsev avantun, la aga ronga lavanga rooro sepsev avantun ga lok ti lara, “Ude u!” La aga ven lara lavaros ga bibi aleng, la mo laradi gat kis teren gam tebeng lisikel to at lekngen. <sup>6</sup>La aga ronga lavanga ga lok ngan laxaka linga boro xantubu ap mo lavanuet levempanga rooro, ga lok, “I epovo do una lox aurut luunun at lempanga anan; kuren la legesa buxom piao ni luunun lixilik ti laradi i gugu at leges aleng, la lavantun buxom balirais

ni luunun lixilik ti laradi i gugu at leges aleng, ketla nemen uta lok kapmek ladan momonok la laxadan vaen.”

<sup>7</sup>La Lanasip ga ba kaxat kepe levelumlut sepsev avanuet la aga ronga laxaka linga at lavanga rooro sepsev avanuet ga lok ti lara, “Ude u.” <sup>8</sup>La nia aga milik kaxat, la aga ven lara lavaros ga ngangan la mo laradi gat kis teren, laasen teren ne Lanmet; la lara ga mumu ro melemu, laasen teren ne Edesa. La duga lok ka lololos mavana at lenep i sepsev avanuet at limixin axap at na lavatbung menemen, kusu duna sev amet di keneng at levenesep silok; la loroxo la levenanmeres silok la levempanga mi lavanuet kangkedek atdi diba sev amet bok limixin.

<sup>9</sup>La Lanasip ga ba kaxat kepe manga levelumlut sepsev avalimo. La aga ven uto saparap loxonin laplavang la maxopok teren aga ven labaroonan at limixin nuunu diga met gano. Limixin diga sev amet di mila diga tong asu levelinga at ne Moroa la levelinga ruturun at ne Iesu Karisito. <sup>10</sup>Digap kup lolos mi laxaka linga xeretna, “Moroa lolos aleng, nenu u melemelengan la u ruturun aleng. Lingisa ba uba vaxaru li limixin at lavapaase la una sev amet di ri vorang laniu nema maga ekip tangarang min?” <sup>11</sup>La nedi getgesara diga lok kaka levesingsigaara bunbun la diga lok ka levelinga do dina ngangais be la dina lok mamas, se limixin dina sep bok tentaba at luvutneton di eburu mi lavasaxaruki xerekngan nedi diga uu. Do luutus at nom limixin na epovo, Moroa naba vorang laniu atnedi axap.

<sup>12</sup>La aga ven Lanasip ga ba kaxat kepe manga levelumlut sepsev avanna. La langne silok ga vot, la laxangking gak maxat ngan lavanga singsiga limixin di lox i mi laxabinim bibi at lavatme; la lagaaling axap kopmen goxo soosoo axasep bok ba, ketla ga soosoo memeles ngan ta lada. <sup>13</sup>La laxampenti boro vana at laxalibet diga subu si ukopok ti lavatbung menemen kerekngan lempeven at luuna pik mo i mada vam, im subu si do lamanman silok it mas i. <sup>14</sup>La lamavangkap ga sonao ngan lugun diga vegun i, la lempatkaana axap eburu mi levesoxan diga vas kaxat uto vetpes.

<sup>15</sup>Melemu lavaorong silok at lavatbung menemen la limixin gomgo la luvuttadi amgomgo at limixin esep, la limixin dip novos la limixin lolos, la nedi bok lavasaxaruki la limixin sepmus bok, diga lipe ro at laratabuang la ro xantubu at lempattavut silok to at larakaana, <sup>16</sup>digap kup ti lempatkaana mi lemparuat keretna, “Mina subu pavaa nama la mina lox alipe nama basinge mo laradi it kis to at loxonin orong la basinge bok lebelemamao, Lanasip ba lox asu i rinama, <sup>17</sup>mila mo laaleng silok at lebelemamao atdu na nga ira vot pam la ixo epovo xusu tara naba ekini min.”

#### Limixin Boro Israel (144,000)

**7** <sup>1</sup>Melemu at nai aga ven lavanuet lubungangelo diga tu ro at lavanuet mesuluk at na lavatbung menemen, digam tebeng alis lavanuet

laramera manman at lavatbung menemen kusu lamanman noxot mas lavatbung menemen kopla laras kopla larauna. <sup>2</sup>La nia aga ven manga lara laangelo ga vas su boro at loxot, laxangking it los su e. Neni gap kip lavanga loklok katling at ne Moroa i rooro amisik. La ni gap kup mi laxaka silok ti mo lavanuet lubungangelo diga lok ka lololos kusu ri lok kapmek lavatangka eburu mi laras. <sup>3</sup>La ni ga lok, “Nemen mita lok kapmek lavatangka kopla laras kopla larauna, ise do mana lok li loklok katling to at levenmang at lavasaxaruki at ne Moroa.” <sup>4</sup>La diga tong i ria do leexes atdi axap mo limixin diga ruuna loklok katling at ne Moroa ro at levenmang atdi ga epovo at legesa sangaun kobot mi lavanuet sangaun mi lavanuet larabin sangsangaun kobot (144,000). Nedi at lasangaun mi legepura larabibat me Israel.

<sup>5</sup>Lasangaun mi legepura larabin sangsangaun kobot (12,000) diga lok katling di at libibinat at ne Juda; lasangaun mi legepura larabin sangsangaun kobot (12,000) at libibinat at ne Ruben; lasangaun mi legepura larabin sangsangaun kobot (12,000) at libibinat at ne Gat. <sup>6</sup>Lasangaun mi legepura larabin sangsangaun kobot (12,000) at libibinat at ne Asa; lasangaun mi legepura larabin sangsangaun kobot (12,000) at libibinat at ne Napitali; lasangaun mi legepura larabin sangsangaun kobot (12,000) at libibinat at ne Manase. <sup>7</sup>Lasangaun mi legepura larabin sangsangaun kobot (12,000) at libibinat at ne Simion; lasangaun mi legepura larabin sangsangaun kobot (12,000) at libibinat at ne Levi; lasangaun mi legepura larabin sangsangaun kobot (12,000) at libibinat at ne Isaka. <sup>8</sup>Lasangaun mi legepura larabin sangsangaun kobot (12,000) at libibinat at ne Sebulon, lasangaun mi legepura larabin sangsangaun kobot (12,000) at libibinat at ne Josep, la lasangaun mi legepura larabin sangsangaun kobot (12,000) at libibinat at ne Beniamin.

### **Buaang Limixin Diga Sigaara Levempanga Singsiga Bunbun**

<sup>9</sup>Melemu at nai aga ven buaang nedi limixin, ixo epovo do tara na us nedi. Nedi boro at lengkot axap at na lavatbung menemen, la at larabibat axap la at levenasen bantuxu axap la boro at lempapaase axap, diga tu ro melamgo at loxonin orong la to melamgo bok at Lanasip. Diga sigaara mi levempanga singsiga bunbun. La digam tebeng lempavaxan bisi at levengkikngen di. <sup>10</sup>La digap kup lolos keretna,

“Loklox arooro boro at ne Moroa, mo it kis at loxonin orong teren la boro bok at Lanasip.”

*Sam 3:8*

<sup>11</sup>La mo lubungangelo axap diga tu kangkan loxonin orong la nedi legepu sangaun mi lavanuet loxongkulao amgomgo eburu mi lavanuet levempanga rooro, diga xis tiktikbu mi lempatgulom atdi ro melamgo at loxonin orong la diga lotu parap ne Moroa. <sup>12</sup>Diga lok keretna,

“Tuturun pam. Loklox anarong, la leemi asu, lakleklen, luvukat, la loklok ngangao, mi lololos ti ne Moroa atdik amisik la kopmen taxavaxap teren. Tuturun tinotno.”

<sup>13</sup>La lara atnedi loxongkulao amgomgo ga sue ia, “Nege di na limixin di sigaara mi levesingsiga bunbun, la di laa rinotno meva?”

<sup>14</sup>La aga lok tin keretna, “Leeme Silok. Axoklen i, nenu uklen i.”

La ni ga lok tia, “Nedi na limixin digap tavasus basinge levenmaares lolos; la dira gos pam levesingsigaara atdi mi lada at Lanasip la dira lox anbun axap pam i. <sup>15</sup>Kuren la di tu amisik to melamgo at loxonin orong at ne Moroa la di gugu amisik tin at lengkangkiking mi lengkanimin keneng ap mo loogu laplavang teren; la ne Moroa, mo it kis at nom loxonin orong, neni naba lok tatao avukat di ro xeneng at loogu ren. <sup>16</sup>Di noxo roxo bok ba, la di noxo minu bok ba; la laxangkiking noxo soosoo lolos bok ba mavana atdi la liplivi at laxangkiking noxo sep polo ridi, <sup>17</sup>mila Lanasip mo ik lok kantubu at loxonin orong, neni naba lok tatao di kerekngan laradi ik lok tatao levesipsip teren, la neni ba sat kaka nedi uto at levendan tooro i puvut su la ne Moroa naba lok kepe axap levengkamkabili dan basinge lengkatli atnedi.”

#### Lanasip Ga Ba Kaxat Kepe Levelumlut Sepsev Avanuti

**8** <sup>1</sup>La Lanasip ga ba kaxat kepe levelumlut sepsev avanuti, la lenmila aoon ga nemen to vana at laxalibet at lavantun sangaun minit.

<sup>2</sup>La aga ven lavanuti lubungangelo mo di tu amisik to melamgo at ne Moroa, la diga lok ka lavanuti leventu.

<sup>3</sup>La lara laangelo vetpes, mo gam tebeng logol tingtigon kusu ri xotos levempavaxan una mavak, neni ga vot la ga tu saparap loxonin laplavang to melamgo at ne Moroa. La ni ga lok ka laxampavaxan una kusu na xotos i ri ne Moroa la ga raba bok ne Moroa mi levesingising at limixin teren. Neni ga lox i na ap mo loxonin i gol aleng ga tu ro melamgo at loxonin orong at ne Moroa. <sup>4</sup>La lusuxa at nom levempavaxan una mavak ga urut boro at lekngen mo laangelo uto vana saparap ne Moroa eburu mi mo levesingising atnedi limixin at ne Moroa. <sup>5</sup>La laangelo ga lok ka lavattingtigon la ga suxa i mi laxao boro at loxonin laplavang la ga lu asi min uto at laxangka, la leretepaavat ga repat aoon mi lavanga ga mam eburu mi langne silok.

#### Lubungangelo Diga Mas Leventu Atnedi

<sup>6</sup>Melemu mo lavanuti lubungangelo diga gagas mi lavanuti laratu atnedi kusu dina mas di. <sup>7</sup>Laangelo avot ga mas mo luru ren. La lengkos uat gan bun aleng eburu mi laxao ga subu ukopok ti laxangka eburu mi lada. La lenep sepsev avantun at laxangka ga an axap mi laxao la lenep sepsev avantun bok at larauna ga an axap mi laxao la lempivilis avukat ga an axap.

<sup>8</sup>La laangelo sepsev agepura ga mas luru ren, la mo lara lavanga ga lok ngan lavattaavut silok, laxao gak lok teren, lara ga lu asi min uto xopok

at laras. La lenep sepsev avantun at laras ga vee da; <sup>9</sup>la lenep sepsev avantun at lempanga axap di rooro at lebelen laras diga met. La lenep sepsev avantun at levempattaaxup diga lok kapmek.

<sup>10</sup>La laangelo sepsev avantun ga mas luru ren la langsung lavatpenti ga subu si boro vana at laxalibet ga ngangao lolos ngan loxonaros kao silok, la ga subu at lenep sepsev avantun at laratadan. <sup>11</sup>Laasen ap mo lenti ne Laksoxobi. Lenep sepsev avantun at laradan axap ga so mamao; la buaang nedi limixin diga in ap mo laradan diga met, mila mo levendan ga rem gili la ga so mamao.

<sup>12</sup>La laangelo sepsev avanuet ga mas luru ren la laxangking la lagaaling la larapenti, lara ga sep di la lenep sepsev avantun at laxangking ga buxumin, la lenep sepsev avantun bok at lagaaling ga buxumin, la lenep sepsev avantun at larapenti goxo soosoo. Lenep sepsev avantun at levenaleng kangking, laxangking kopmen goxo soosoo; la lenep sepsev avantun at levenaleng kanimin, lagaaling kopmen goxo soosoo bok.

<sup>13</sup>Nia aga reven i na, la aga ronga lamalom, gang teng lolos to vana at lamavangkap la ni gang teng keretna, “Naba lok kapmek aleng, naba lok kapmek aleng tinedi limixin di rooro at na lavatbung menemen, mila levenmumuat lolos naba vot at loxonaleng mo lavantun lubungangelo dina mas laratu atdi la mo loxonaleng ira auret ta.”

**9** <sup>1</sup>La laangelo sepsev avalimo ga mas mo luru ren la aga ven lenti no xopok at laxangka ga subu si boro vana lamavangkap. La mo lenti ga lok ka lengki ri suang lumusaragu at lemeroon. <sup>2</sup>La ni ga suang lumusaragu at lemeroon la lusuxa ga ravasu ngan lusuxa at langsung laxao. La mo lusuxa ga vula pe laxangking eburu mi lamavangkap la laxangking goxo epovo ri soosoo. <sup>3</sup>La laxanasku ga ravasu boro at lusuxa uto at laxangka, la diga lok ka lololos ngan lololos at laksoxomet at na lavatkangka. <sup>4</sup>La diga lok ka levelinga do nemen gat di guta lok kapmek lempivilis at na lavatkangka koplavenasen ang bok, koplavenuna; ketla dina lox asongot mene limixin, kopmen di goxo ruuna loklok katling at ne Moroa ro at levenmang atdi. <sup>5</sup>La diga lok ka lololos kusu ri lox asongot nedi at lavalimo gaaling mun, ketla nemen gat di guta sev amet di. Mo losongsongot nedi diga suma i, ga lok ngan losongsongot at laksoxomet do i bi asongot laradi. <sup>6</sup>La keneng ap mo lavalimo gaaling limixin dibam suma mo losongsongot silok la diba vara ri lanmet, ketla di noxo vuse ka i. Diba vara meremet ketla lanmet naba o basinge di.

<sup>7</sup>Mo laxasixu diga ven ngan laxanos diga gagas kusu ri leesep. La to at lempatlak atdi diga siga lempatbungorong, ga lok ngan logol. La levenmeren diga lok ngan levenmeren at luvuttadi. <sup>8</sup>Lengkabinim atdi ga baalom ngan lengkabinim at lavakin la levesangsa atdi ga lok ngan levesangsa at laion. <sup>9</sup>Diga siga pe lenbongobong atdi mi levempanga

singsiga aen; la lasasang at levempapa atdi ga lok ngan lasasang at laxanos eburu mi laxangkaris digak sixit uto at leesep. <sup>10</sup>La diga ruuna bok levenatketke la ga soxobi ngan at levenaksoxomet; la mo lololos ti sev asongot gak lok at levenatketke atdi la diga epovo na lox asongot limixin keneng at nom lavalimo gaaling. <sup>11</sup>Diga ruuna loorong silok, neni laangelo ik lok tatao lemeroon; laasen teren keneng at lavapaase Ibru do ne Abadon la at lavapaase Grik do ne Apolion. Lavasuun at na laasen do 'Laradi sesele utut kepe.'

<sup>12</sup>Lumumuat avot mo gara xap ta, ketla legepu mumuat move gara vot bok.

<sup>13</sup>La laangelo sepsev avanna ga mas lurus ren, la aga ronga laxaka linga boro at lavanuet mesuluk ap mo loxonin laplavang i gol la i tu ro melango at ne Moroa, <sup>14</sup>la ni ga lok ti mo laangelo sepsev avanna xeretna, "Una soxomus asu lavanuet lubungangelo mo dik lok at loxokoxo to at ladan silok Iupretis." <sup>15</sup>Ni ga soxomus asu mo lavanuet lubungangelo la mo diga gagas ti mo loxonatat aleng ap mo laaleng ap mo lagaaling la ap mo lamaares kusu dina sev amet lenep sepsev avantun at limixin axap. <sup>16</sup>La aga ronga luutus at limixin esep ga buaang aleng, digat kis at laxanos atdi ga epovo at legepu sangaun kobot milion. 200,000,000. <sup>17</sup>La keneng at na lisilimet tarak aga ven mo laxanos la mo luvuttadi digat kis atdi diga siga pe lenbongobong atdi, mi levempanga singsiga aen mo ga memele aleng, la ga mamaxa ngan la sapira, ni loxonuat gamgames i mamaxa; la nom lempanga singsiga ga ngangan bok ngan salpa, mo i lok ngan laxakup ngangan. La lempatlak ap mo laxanos ga lok ngan lempatlak at laxan laion, la laxao eburu mi lusuxa la lasalpa ga ravasu boro at levenngusno atdi. <sup>18</sup>La na lavantun levempanga, laxao, lusuxa, la lasalpa ga sev amet lenep sepsev avantun at limixin axap. <sup>19</sup>Lololos ap mo laxanos gak lok to at levenngusno atdi, la to at levenatketke atdi. Mo levenatketke atdi ga lok ngan lempasii la diga ruuna lempatlak atdi kusu dina sev asongot bok limixin min.

<sup>20</sup>La nedi limixin di goxo met ap mo levesongsongot, di goxo leeng basinge leveloklok kakapmek atdi. La move di goxo xap ti lotu saparap lubunggas la lempoovo moroa diga lox i mi levenuut ngan logol, la siliva la borons la levenuut petpes bok la levengkonuna, mo lempanga dixo epovo do dina reven la dinang tonga la dinat pas. <sup>21</sup>La kopmen bok nedi limixin di goxo leeng basinge loklok ti sev amet tadi, la loklok ti lok levesak la loklok kakapmek maxamang at lixitkis epot la loklok kipkip pilo.

### Laangelo La Lugun Linga Lixilik

**10** <sup>1</sup>Melemu aga ven manga lara laangelo lolos ga si boro vana at laxalibet. La loxontakabu ga itis i ngan lavanga singsigaara, la

laxaburi gak lok to mavana at lavatlak teren. La lemeren ga soosoo ngan laxangking la luxangkedek teren ga lok ngan legepu xus una, laxao gak lok teren. <sup>2</sup>To at lekngen neni gam tebeng loxon gun linga lixilik mo ga repalas pam; la laxangkedek tino ren ni ga vaxaru i ro at laras la laxangkedek kia ren ni ga vaxaru i ro at laxangka. <sup>3</sup>La ni ga xup lolos mi laxaka linga silok ga lok ngan lavat laion im booro lolos; neni ga xup kerepmo la lavanuti levempanga tepaavat diga vaase porang i. <sup>4</sup>Aga gagas kusu ana malagan mo levelinga diga tong i, ketla aga ronga laxaka linga at lara ro vana at laxalibet ga lok tia, “Nemen uta malagan mo levelinga atdi, ni ba nemen alipe mun.”

<sup>5</sup>La mo laangelo aga ven i, ga tu ro at laras la to at laxangka, ga songurut mi lekngen tino upana ri laxalibet, <sup>6</sup>la ga vangpe mi laasen at ne Moroa mo i rooro amisik la kopmen taxavaxap teren, la ga rudum li laxalibet la lempanga dik lok teren, la lavatkangka la lempanga dik lok teren, la laras la lempanga dik lok keneng teren, la ni ga lok keretna, “Moroa kopmen noxo ngais abao.” <sup>7</sup>Ketla ap mo levenaleng laangelo sepsev avanuti naba mas luru ren, ne Moroa naba lox asorun mo lodoxoma alipe ren, kerekngan neni gara tong axasep pam i ri lavaeme vapaase alii ren, nedi lavaanat saxaruki ren. <sup>8</sup>La mo laxaka linga nia aga ronga avor i, ga paase ria boro vana at laxalibet, ga lok manga ria, “Unat pas la una lok ka lugun linga mo i repalas pam la mo ik lok at lekngen laangelo mo i tu ro at laras la laxangka.”

<sup>9</sup>La aga vot pasa mo laangelo la aga sue i mi lugun linga kusu na raba ia min; la ni ga lok tia, “Una lok ka na lugun linga la una anan i; naba so mamao to at labalam ketla ro at langsum ni naba so avukat ngan limisiu.” <sup>10</sup>Aga lok ka mo lugun linga lixilik boro at lekngen laangelo la aga an i, la ni ga lok ngan tinotno ladan misiu ro at langsuk; se aga linge i, ni ga so mamao ro at labalak. <sup>11</sup>La laangelo ga lok tia, “Mo manga una tong asu levelinga at ne Moroa mumu laxanabung mixin solo, levennep silok i buaang, la larapapaase la lavaorong silok.”

### Moraa Ga Riki Legepu Radi Xusu Duna Vavang

**11** <sup>1</sup>La laangelo ga raba ia mi lakdak soksoxovo, la ni ga lok tia, “Unat pas la una soxovo loogu laplavang at ne Moroa la loxonin laplavang keneng teren, la una us bok nedi di lotu go. <sup>2</sup>Ketla nemen uta soxovo lemelua ik lok kangkan mo loogu laplavang, mila nom lemelua ik lok ti limixin kopmen di me Judaia. La nedi dibat pas axangka lemenemen kaala Jerusalem at lavanuet sangaun mi legepura leven gaaling. <sup>3</sup>La ap mo levenaleng aba riki aonon luradi vapaase rak mi lololos kusu duna vavang mi levelinga rak ap mo legesa abin sangsangaun kobot mi legepu sangaun kobot mi lavanna sangaun aleng (1,260); la duba siga mun lengkontamon gurusek at limixin dik saxaanu.” <sup>4</sup>Mo luradi vapaase, nedu legepu una olip la nedu



bok lubabao di tu gagas to melango at ne Moroa, ni lo Moroa at na lavatbung menemen. <sup>5</sup>La do tara na lok tong i xusu na sep du, laxao ba soli su boro at lungusno du, la ba rin asonao lavamunepen atdu; la at na mun langas do tara na lok tong i xusu na sep du, neni naba met kerepno. <sup>6</sup>Dunaba ruuna lololos kusu ri ru pe larakabu la noxo vot ap mo levenaleng do nedu dunaba vavang teren, la dunaba ruuna bok lololos kusu duna ba gili levendan ti lada, la dunaba ruuna bok lololos tip sev amisik limixin at na lavatbung menemen mi levenasen songsongot axap, mo do duba vara i do duna lox amisix i.

<sup>7</sup>Do duna lox axap mo lugugu ri vaase asu levelinga at ne Moroa, lara lavatpanga sio mi lavanuet kangkedek teren ba vasu ap mo lemeroon la ba esep mi mo luradi at ne Moroa la naba ranga alis du la na sev amet du. <sup>8</sup>La lubantuxu atdu nabak midi ro at langas ap mo lemenemen silok, ap mo mun loxot Leeme Silok atdu ga met at laxaba ve. Luasen poovo ap mo lemenemen ne Sodom la ne Isip. <sup>9</sup>La limixin boro at levengkot axap, la larabibinat, la levempapaase, la levenbantuxu diba reven lubantuxu atdu at lavantun mi loxon atat aleng la di noxo mulus kusu dina lok li lubantuxu atdu at lamaaut. <sup>10</sup>La limixin axap at lavatbung menemen diba momo aleng mumu lanmet atdu. Diba lok larapeluxa silok la diba etaba ela mi leventamtaba atdi. Lavasuun teren do na luradi vapaase duba lok buaang levempanga songsongot mavana at limixin.

<sup>11</sup>Ketla melemu at lavantun mi loxon atat levenaleng, Moroa ba raba mamas du, la duba xatu kaxat, la nedi limixin diba ven du, diba marat aleng. <sup>12</sup>La na luradi vapaase duba ronga lara na vaase ridu boro vana at laxalibet la ba lok, "Ude numu vana." La duba urut uto vana at laxalibet keneng at loxontakabu, la limixin munepen midu mo diba tu la diba reven du.

<sup>13</sup>La ap mo mun loxonaleng langsung langne ba vot, la lenep i sepsev asangaun ap mo laraugu xeneng at lemenemen silok ba rem tereve axap; la lavanuti larabin sangsangaun kobot (7000) limixin diba met at nom langne, la nedi limixin diba roo suu ap mo langne diba marat aleng tinotno la diba emi asu mi ne Moroa no vana at laxalibet.

<sup>14</sup>La nom lumumuat sepsev agepura na nga ira xap, ketla lumumuat sepsev avantun move la i auret do na vot.

### Laangelo Sepsev Avanuti

<sup>15</sup>La laangelo sepsev avanuti ga mas lurus ren, la aga ronga laxaka linga silok at lentaba to vana at laxalibet ga lok keretna,

'Amo nga Leeme Silok atdik eburu mi Lanarong teren du ru ka loklok tatao at na lavatbung menemen. La nedu dunaba lok tatao amisik la kopmen taxavaxap teren.'

*Sam 145:13*

<sup>16</sup>La nedi legepu sangaun mi lavanuet loxongkulao amgomgo mo digat kis at levengkonin orong atdi to melango at ne Moroa, diga xis tiktikbu mi lempatgulom atdi la diga lotu parap ne Moroa. <sup>17</sup>Diga lok keretna,

‘Ma tong avukat tu, Leeme Silok, ne Moroa i lolos aleng, mo ga nemen gano la i nemen bok lingina, mila ura gu asu vam mi langsung lololos taram la ura ru ka vam loklok tatao ram at na lavatbung menemen. <sup>18</sup>Nedi lavamolon diga musak teng tino, ketla laaleng ira vot pam kusu una lox asuusu lebelemamao ram, la uba lok li limixin digara met pam at lavapaase. Ni laaleng bok kusu uba raba luunun avukat ti lavaeme vapaase alii ram, nedi lavasaxaruki ram la tinedi limixin nuunu la nedi bok dik lok ngangao at laasen taram; nedi limixin gamasa la nedi bok di ruuna laasen silok. La laaleng ira vot pam kusu uba sele utut kepe nedi limixin diga lok kapmek lixitkis nunuan at na lavatbung menemen.’

*Sam 2:1*

<sup>19</sup>Melemu at na, loogu laplavang at ne Moroa ga rem suang to vana at laxalibet, la limixin diga ven lobokis kaala, mo ga lok katling lekabus maxat at ne Moroa. La limixin diga ven lavanga ga mam etitit, la diga ronga leretepaavat gak lox epasum la diga suma lavarangne silok la lengkos uat gan bun aleng ga subu.

#### Latkin La Ne Satan

**12** <sup>1</sup>Lara loklok katling silok ga ravasu to vana at lamavangkap. Lara latkin ga rupot, laxangking ga itis i ngan lisingsigaara ren, la lagaaling gak lok to maxopok at luxangkedek teren, la ni ga siga lasangaun mi legepura larapenti ro at lavatlak teren ngan lavatbungorong. <sup>2</sup>Neni ga balan madak, la ga auret ta do na visik, la losongsongot teren ga lolos la neni ga reng. <sup>3</sup>La lara loklok katling bok ga ravasu to vana at lamavangkap. Lara langsung lavattulaava memele ga rupot. Ni ga ruuna lavanuti lempatlak la lasangaun lempatkom, la lavanuti lempatbungorong gak lok at nom lavanuti lempatlak teren. <sup>4</sup>Latketke ren ga rev asi lenep sepsev avantun at larapenti boro vana at laxalibet la ga lu asi midi ude xopok at lavatkangka. La na lavattulaava ga tu to melamgo at nom latkin kusu neni na anan lamdak teren do ni na visik asu i. <sup>5</sup>La neni ga visik lamdak temes, mo naba lok tatao limixin axap at na lavatbung menemen la loklok tatao ren naba lolos aleng. Ketla ne Moroa ga lok ka mo lamdak uto vana at loxonin orong teren. <sup>6</sup>La mo latkin ga sixiro uto at lamatbin at lara loxot ne Moroa ga lox agagas li i, la neni ba lok tatao i go at legesa abin sangsangaun kobot mi legepu sangaun kobot mi lavanna sangaun (1,260) aleng.

<sup>7</sup>La lara leesep ga xatu kaxat to vana at laxalibet. Mikael, lara laangelo gomgo eburu mi lubungangelo teren diga esep eburu mi nom lavattulaava; la nom lavattulaava eburu mi lubungangelo ren diga esep tangarang di. <sup>8</sup>Ketla ne Mikael eburu mi lubungangelo ren diga sak tup mi mo lavattulaava, la neni eburu mi lubungangelo ren goxopmen bok ba toxot tidi xusu tik lok to vana at laxalibet. <sup>9</sup>La ne Mikael eburu mi

lubungangelo ren diga lu asi mi mo lavattulaava eburu mi lubungangelo ren. Neni lavattulaava me gaxatnak, luasen teren ne Devel la ne Satan, mo i sasar asoogong limixin axap ti laxapmek; nedi diga lu asi midi ude xopok at na lavatbung menemen.

<sup>10</sup>La aga ronga laxaka linga silok to vana at laxalibet ga lok keretna, “Mo nga loklox arooro at ne Moroa la lololos teren eburu mi Linintoo ren naba ru asaxaven. La na nga Lanarong teren naba lox asuusu lololos teren to xopok at lavatbung menemen; mila ne Satan mo ga tu ro melango at ne Moroa xusu neni na babala raba luvutneton dik at levenaleng kangking la kanimin. La lubungangelo at ne Moroa digara lu asi vam min uto xopok. <sup>11</sup>La luvutneton nedik dira sak tup pam mi ne Satan mila diga nuunu at lada at Lanasip la at lempapaase ruturun at ne Moroa, mo levelinga diga tong asu i la di goxo marat mi lorooro atdi, diga gagas kusu dina met. <sup>12</sup>Kuren la mina momo, nemi limixin mik lok de vana at laxalibet. Ketla naba lolos aleng tinedi limixin di nemen to xopok at lavatbung menemen la to saparap laras; mila ne Satan ira si vam saparap nimi la i musak aleng tinotno, mila ikleklen i do neni noxo nemen abao ro xopok.”

*Jop 1:9-11, Sam 96:11*

<sup>13</sup>Nom lavattulaava ga ven kibis i do lubungangelo diga lu asi min ude xopok at lavatbung menemen, la neni ga xala mu mo latkin, no ga visik mo lamdak temes. <sup>14</sup>Ketla ne Moroa ga raba nom latkin mi legepu vapa at lamalom silok kusu rin ti rava basinge mo lavattulaava la uto at lamatbin. Mo go ne Moroa ga lox agagas li vam loxot tin, kusu ni bak lok tatao i go at lavantun mi loxonatat levenmaares. <sup>15</sup>La ladan sen silok ga rem sobang su boro at lungusno at lavattulaava, kusu ladanut naba suxu xepe nom latkin la na sev amer i. <sup>16</sup>Ketla lavatkangka ga lok tooro nom latkin, la lara lamamara ga rem suang la lavatkangka ga xanom mo ladan silok ga sixisu boro at lungusno at nom lavattulaava. <sup>17</sup>La melemu mo lavattulaava ga musak teng aleng mumu nom latkin, la ni ga vas kaxat basinge i, la ga onon uto at lenep petpes kusu na esep eburu mi livipisik li at nom latkin; nedi mo ding tonga res at levelinga at ne Moroa la di nuunu at levempapaase ruturun at ne Iesu. <sup>18</sup>La mo lavattulaava ga tu ro loxon at lisigege at laras.

### Lavatpanga Sio Mi Lavanuet Kangkedek Teren

**13** <sup>1</sup>La nia aga ven lara lavatpanga sio mi lavanuet kangkedek teren ga ravasu boro at laras, ni ga ruuna lasangaun kom la lavanuti lempatlak, la lasangaun lempatbungorong gak lok ap mo lasangaun kom. La at nom lavanuti lempatlak, lavanuti levenasen aksaksa gak lok ti vaase vupu ri ne Moroa. <sup>2</sup>La mo lavatpanga sio ga lok ngan lavatlepat, la lengkangkedek teren ga lok ngan at lavatbea, la lungusno ga lok ngan at lavat laion. La mo lavattulaava ga raba i mi lololos teren la lixitkis teren

ti lok tatao limixin la lisisilok teren mavana at lempanga axap. <sup>3</sup>La ga milik ngan lara at nom lempatlak at nom lavatpanga sio ga ruuna lining kooxing, lara ga sev aroogo i, ketla neni ga lox avukat manga. La limixin axap at na lavatbung menemen diga sangu aleng at nom lavatpanga sio la diga mumu asu i. <sup>4</sup>La diga lotu parap nom lavattulaava mila neni ga raba lololos teren ti lavatpanga sio. La mo limixin diga lotu parap bok lavatpanga sio, diga lok keretna, “Kopmen tara i epovo mi na lavatpanga sio, la kopmen tara i epovo na sak tup min.”

<sup>5</sup>La ni ga lok ka lololos kusu na vaase vupu la aksaksa ri ne Moroa. La ni ga epovo bok ti lok lempanga salai i vara rin at lavanuet sangaun mi legepu gaaling. <sup>6</sup>La ni ga ru ka i xusu na paase vupu ri ne Moroa, la ri laasen teren, la loxot kitkis teren, la tinedi bok dik lok to vana at laxalibet. <sup>7</sup>La ni ga lok ka lololos kusu na esep mi limixin at ne Moroa la na sak tup midi. La ni ga lok ka bok lololos mavana at limixin boro at larabung mixin axap la boro bok at levenasen bantuxu la boro bok at lempapaase axap la boro bok at levennep silok axap. <sup>8</sup>La limixin axap at na lavatbung menemen diba lotu parav i; nedi limixin kopmen levenasen atdi ik lok at lubuk at lorooro, mo lubuk ga nemen avot ti luruntudum li at na lavatbung menemen, la ni lubuk at Lanasp, mo ga uu at laxaba.

<sup>9</sup>Do tara i ruuna lubaalung, i lox avukat do neni na ronga ka na levelinga.

<sup>10</sup>‘Do ne Moroa gara tong li vam i do tara nabat pas ti loxokoxo, neni naba vubeles ti loxokoxo; la do ne Moroa gara tong li vam i do diba sep tara mi lavarise sepsep, neni naba uu at leesepp mi lavarise sepsep.’

*Jer 15:2, 43:11*

Kuren la limixin at ne Moroa dina tu tuxuruxun at lunuunu atdi la dina ngangais mi lomomo keneng ap mo levenmumuat.

### **Lavatpanga Sio Ga Vasu Boro Maxopok At Laxangka**

<sup>11</sup>La nia aga ven bok lara lavatpanga sio vetpes ga vasu boro maxopok at laxangka; neni ga ruuna legepu kom, ga lok ngan luvatkom at lanat sipsip; la mo lavatpanga sio ga paase aksaksa ngan mo lavattulaava silok. <sup>12</sup>Neni ga ruuna ka lololos ap mo lavatpanga sio avot la ga pu soso limixin kusu dina lotu parap mo lavatpanga sio avot, no lara ga sev aroogo i, ketla neni ga lox avukat manga. <sup>13</sup>La mo lavatpanga sio sepsep agepura ga lok buaang lempanga sangsangu; ni ga lok laxao ga si boro vana at lamavangkap la ukopok ti laxangka. Ni ga lox i na ro melamgo at limixin axap kusu dina ven i. <sup>14</sup>La neni ga ruuna lololos ti lok levempanga sangsangu kusu na lox asilok lavatpanga sio avot, la kerepmo neni ga xarang arup limixin at na lavatbung menemen. Ni ga tong i ridi xusu dina lok lovoovo vanga ap mo lavatpanga sio avot, mo ga ruuna linin kooxing at lavarise sepsep, ketla kopmen goxo met teren. <sup>15</sup>La

mo lavatpanga sio sepsev agepura ga ruuna ka lololos tin kusu na mas arup lamamas tooro uto xeneng at nom lovoovo vanga at lavatpanga sio avot, kusu neni na epovo ri paase la na sev amet nedi di xopara na lotu parav i. <sup>16</sup>La na lavatpanga sio sepsev agepura ga pu soso limixin axap, nedi limixin gamasa la limixin silok, nedi limixin nopnovos la limixin banbalo, la nedi limixin sepumus la limixin saksaxaruki; ni ga pu soso di xusu dina lok li loklok katling ap mo lavatpanga sio to at levengkiknggen tino di xopla to at levenmang atdi. <sup>17</sup>La do tara i vara na un ka tempanga kopla na sesep mi lempanga, neni na ruuna be mo loklok katling; nom loklok katling ni laasen at nom lavatpanga sio xopla lexekexes at laasen teren.

<sup>18</sup>Mina lok ka lodoxoma avukat ti na. Do tara ikleklen aleng, neni na gu asu na leexes at lavatpanga sio. Na leexes i lok katling lara laradi, la leexes teren i epovo at lavanna sangaun kobot mi lavanna sangaun mi lavanna. (666)

### Lanasip Eburu Mi Limixin Teren

**14** <sup>1</sup>La nia aga milik kaxat la aga ven Lanasip ga tu to at lakaana Saion. La aga ven bok buaang limixin eburu min, mo diga epovo at legesa sangaun kobot mi lavanuet sangaun mi lavanuet larabin sangsangaun kobot (144,000) la diga ruuna laasen at ne Iesu eburu mi laasen at ne Temen to at levenmang atdi. <sup>2</sup>La aga ronga laxaka linga boro vana at laxalibet ga ninni ngan ladan silok i sesen lolos la ga ninni ngan bok lavanga i repaavat. Mo laxaka linga aga ronga i ga lok ngan bok luvuttadi diga sep levengkontaaleng. <sup>3</sup>La mo digak pixan mi loxompixan maxat to melamgo at loxonin orong at ne Moroa, la to melamgo at lavanuet levempanga rooro la to melamgo at loxongkulao amgomgo. Kopmen teta goxo epovo nak lok kaka mo loxompixan, ketla nedi na limixin kusuk mun, Moroa gara un ka amlong nedi kantubu at limixin at lavatbung menemen. <sup>4</sup>Nedi mun na limixin di goxo lok taxakapmek maxamang at lititkis epot, mila diga tu asepsu basinge loklok ti elong ka. Nedi na limixin di mumu amisik Lanasip; Moroa ga un ka amlong di xantubu at limixin la diga lok ngan levempipisik avot ti ne Moroa la Lanasip. <sup>5</sup>La kopmen di goxo tong asu toxolinga xaxarang at lorooro axap atdi; la kopmen tavanga xapmek ik lok atdi.

### Lempapaase Asu At Lavantun Lubungangelo

<sup>6</sup>La nia aga ven manga lara laangelo gap tava to vana at lamavangkap, la ni gap kip Lagale Lavavangi i nemen amisik kusu na tong asu i ri limixin axap at na lavatbung menemen, nedi boro at levennep silok axap, la boro bok at larabung mixin axap, la boro bok at levempapaase axap, la boro bok at levenasen bantuxu axap. <sup>7</sup>Ni ga vaase silok keretna, “Mina

lok ngangao aleng at ne Moroa la mina emi asu min, mila loxonaleng i auret kusu neni na ronga linga at limixin axap. Mina lotu parap ne Moroa, mo ga rudum li laxalibet, lavatangka, laras, la laradan axap.”

<sup>8</sup>La na laangelo avot ga onon la laangelo sepsev agepura ga rupot manga la ga lok, “Lemenemen silok Babilon ira xapmek pam, mo ga pu soso limixin at levengkot axap kusu dina vubeles at laxakapmek silok teren.”

<sup>9</sup>Melemu atdu laangelo sepsev avantun ga rupot manga la ga xup lolos keretna, “Mo do tara na lotu saparap mo lavatpanga sio la lavatpooovo vanga ren, la na ruuna ka loklok katling ap mo lavatpanga sio to at lamang teren, koplala to at lekngen, <sup>10</sup>neni bok naba suma ka lebelemamao at ne Moroa i lolos aleng; la neni nabang songot aleng to xeneng at laxao at lasalpa to melamgo at lubungangelo at ne Moroa la to melamgo bok at Lanasip. <sup>11</sup>La mo losongsongot ba lok ngan lusuxa i urut amisik la kopmen noxo xap at levenaleng kangking la kanimin bok; tara naba ekip tangarang mi na losongsongot do neni ga lotu saparap lavatpanga sio la lavatpooovo ren, koplala neni ga ruuna loklok katling at laasen at lavatpanga sio.” <sup>12</sup>Na lavanga naba rupot, kuren la nedi limixin nuunu at ne Moroa mo ding tonga res at levelinga ren la di tu tuxuruxun at lunuunu atdi saparap ne Iesu, i epovo xusu dina nemen mulus mo do levenmumuat ba rupot.

<sup>13</sup>La aga ronga levelinga ga si boro vana at laxalibet ga lok tia, “Una malagan i na. Luvukat tinedi dinaba met mi lunuunu atdi keneng at Leeme Silok ne Iesu, i ru ka nga i mo.” La Loroonan Kaala ga lok bok keretna, “I ruturun aleng. Diba ruuna loklox amas basinge levenmumuat la levesongsongot atdi, mila diba ruuna ka luunun avukat at lorooro melemu ti mo leveloklok nunuan digara lok pam i.”

#### Lisilimet At Laaleng Ete

<sup>14</sup>La nia aga milik kaxat, la aga ven loxontakabu bunbun, la to mavana ap mo loxontakabu aga ven lara gat kis teren, ga milik ngan Laradi Mevana, la lavatbungorong gol gak lok at lavatlak teren, la neni gam tebeng lavarise sengsen. <sup>15</sup>La lara laangelo vetpes manga ga vas su boro xeneng at loogu laplavang, la gap kup lolos ti mo laradi gat kis at loxontakabu la ga lok, “Una ru ka lugugu mi nom lavarise ram, mila laaleng mo ira vot ta, kusu una sep korop ka levempiao at na lavatbung menemen mo ira mukun pam.” <sup>16</sup>La mo laradi gat kis ap mo loxontakabu ga gu xat mi mo lavarise ren at lavatbung menemen la ni ga lok bubua ka limixin axap at ne Moroa.

<sup>17</sup>La lara laangelo vetpes manga ga vasu at loogu laplavang to vana at laxalibet, la neni bok gam tebeng lavarise sengsen. <sup>18</sup>La lara laangelo vetpes mo gak lok tatao laxao, ga laa boro at loxonin laplavang. La ni

ga xup lolos ti mo laangelo gam tebeng lavarise sengsen; la ni ga lok keretna, “Una gugu mi nom lavarise sengsen taram la una lok bubua ka levempipisik at lavaen at na lavatbung menemen, mila lempeven teren ira mukun pam.”<sup>19</sup> Kuren la laangelo ga gu xat mi lavarise ren at na lavatbung menemen la ga lok bubua ka lempeven at lavaen, la ga lu abeles midi ro xeneng at loxot lili at levempeven vaen, mo i ru katling lebelemamao at ne Moroa.<sup>20</sup> La mo lempeven vaen digat pas puuvus asu ladan teren to maxamang ap mo lemenemen silok, la lada ga sixisu boro xeneng ap mo loxot lili at levempeven vaen; mo lada ga umsu aleng ngan ladanut la lamaxat ap mo ladan ga si aleng ngan lababaalom at laradi la ga sesen uto vaxalom, ga epovo at lavantun sangaun kobot (300) leveng kilomita.

### Lavanuti Lubungangelo La Lavanuti Levesongsongot Silok

**15**<sup>1</sup>La nia aga ven manga lara loklok katling to vana at laxalibet, ga silok aleng la ga ven nunuan. Lavanuti lubungangelo mi lavanuti levesongsongot mo, nedilumumupit ti leveloklox asongot axap, la di ru katling laxavaxap at lebelemamao at ne Moroa, mo ni naba lox asuusu i.<sup>2</sup>La aga ven lara lavanga ga milik ngan loxontas gan tanan eburu mi laxao. La aga ven bok nedilimixin diga sak tup mi mo lavatpanga sio la lavatpoovo vanga ren, la lexekexes at laasen teren; diga tu saparap mo loxontas gan tanan la digam tebeng levengkontaaleng to at levengkikngen di, ne Moroa ga raba di min;<sup>3</sup>la digak pixan mi loxompixan at ne Moses, lasaxaruki at ne Moroa la digak pixan bok mi loxompixan at Lanasip; diga lok keretna,

“Moroa Leeme Silok, u lolos aleng. Lempanga axap nenu uk lox i, i silok la i lox avukat aleng. Leventaangas taram la leveloklok taram ik mokso la i ruturun aleng. Nenu Loorong Silok mavana at limixin axap at na lavatbung menemen.<sup>4</sup>Leeme Silok. Limixin axap dinaba lok ngangao ram la di naba emi asu mi laasen taram, mila nenu xusuk mun u melemelengan. Limixin axap at na lavatbung menemen dinaba vosiga u la dinaba lotu parav u, mila levendomdoma mokmokso ram ga ravasu at lasaxaven.”

*Sam 111:2; 145:7; Jer 10:7 Sam 86:9*

<sup>5</sup>Melemu at na nia aga ven loogu laplavang ga rem suang to vana at laxalibet la aga ven mo lenep i xaala aleng to xeneng teren.<sup>6</sup>La lavanuti lubungangelo eburu mi lavanuti leveloklox asongot diga vas su boro xeneng ap mo loogu laplavang. Diga sinang mi levesingsigaara gamgames, gan tanan aleng la levengkontamon gol ga itis korop lenbongobong atdi.<sup>7</sup>La lara ap mo lavanuet levempanga rooro ga raba na lavanuti lubungangelo mi lavanuti leventingtigon gol ga umsu mi langsung lebelemamao at ne Moroa, mo naba nemen amisik, la kopmen taxavaxap teren.<sup>8</sup>La loogu laplavang ga umsu mi lusuxa boro at

lisisixam la lololos at ne Moroa la goxo epovo do tara gita beles ukeneng at loogu laplavang ise at laxavaxap ap mo lavanuti leveloklox asongot at lavanuti lubungangelo.

### Lavanuti Leventingtigon At Lebelemamao At Ne Moroa

**16** <sup>1</sup>La nia aga ronga laxaka linga silok ga vaase su boro xeneng at loogu laplavang, la ga lok ti mo lavanuti lubungangelo xeretna, “Minat pas la mina soli asu lebelemamao at ne Moroa i nemen keneng at nom lavanuti leventingtigon to at lavatbung menemen.”

<sup>2</sup>La laangelo avot gat pas la ga soli asu mo lebelemamao ri limixin at na lavatbung menemen. La lemparabi silok gang songot aleng, ga vot saparap mo limixin diga ruuna loklok katling ap mo lavatpanga sio la diga lotu parap lavatpoovo vanga ren.

<sup>3</sup>La laangelo sepsev agepura ga soli asu lebelemamao at ne Moroa ri laras la laras ga ravasu ngan ta lada at laradi i met, la lempanga axap at lebelen laras ga met.

<sup>4</sup>La laangelo sepsev avantun ga soli asu mo lebelemamao at ne Moroa ti laradan silok la levempuvut dan bok, la diga ravasu ngan lada. <sup>5</sup>La aga ronga laangelo ik lok tatao laradan ga lok ti ne Moroa,

“Lodoxoma ram ti lok li na losongsongot ura lok li vam i at lavatbung menemen ik mokso aleng. Kuren la ne Moroa, nenu u melemelengan lingina la gano bok, <sup>6</sup>mila nedi limixin kapmek diga sev amet limixin nuunu eburu mi lavaeme vapaase alii ram, kuren la ura raba nedi limixin kapmek mi lada kusu nedi dina in i, la ik mokso aleng do nedi limixin kapmek dina in mo lada.”

*Ais 49:26*

<sup>7</sup>La melemu aga ronga lempapaase boro at loxonin laplavang ga lok keretna,

“I raturun aleng. Nenu ne Moroa, Leeme Silok, u lolos aleng. La lodoxoma ram ti lox asusu mo levesongsongot, ik mokso la i epovo rinotno at loklok, mo limixin diga lox i.”

<sup>8</sup>La laangelo sepsev avanuet ga soli asu lebelemamao at ne Moroa ro at laxangking. La laxangking ga lok kaka lololos kusu nan bonbo limixin mi liplivi silok teren. <sup>9</sup>La laxangking gan bonbo nedi, la diga paase aksaksa ri laasen at ne Moroa, mo i ruuna lololos mavana at nom levesongsongot. Ketla nom limixin di goxo para rinotno xusu dina leeng basinge laxapmek atdi la dina emi asu mi ne Moroa.

<sup>10</sup>La laangelo sepsev avalimo ga soli asu manga lebelemamao at ne Moroa ro at loxot kitkis at lavatpanga sio, la mo lixitkis teren ga nemen at lamain bonot, la limixin diga atat aleng leven gam atdi mumu losongsongot silok atdi. <sup>11</sup>La diga paase aksaksa ri ne Moroa no vana at laxalibet mumu losongsongot la laxanabi atdi, ketla di goxo para rinotno xusu dina leeng basinge mo laxapmek diga lox i.



<sup>12</sup>La laangelo sepsev avanna ga soli asu lebelemamao at ne Moroa to at ladan silok Iupretis. La mo ladan ga mes axap, kusu ri lox agagas li langas ti lavaorong silok boro at lenep laxangking i soosoo su e. <sup>13</sup>La nia aga ven lavantun lubunggas ga milik ngan laxarokrok, lara ga sixisu boro at lungusno at lavattulaava, la lara boro at lungusno at lavatpanga sio, la lara boro at lungusno at laradi vapaase alii xaxarang. <sup>14</sup>Nedi na leventoonan at lubunggas di ruuna lololos kusu dinak lok lempanga sangsangu. La diga epeseves ti lavatbung menemen axap, kusu dina lok bubua ka lavaorong silok eburu mi limixin esep atdi ri mo leesep ba vot ap mo langsung laaleng silok at ne Moroa i lolos aleng.

<sup>15</sup>La ne Iesu ga lok keretna, “Nia aba vot ngan laradi xipkip pilo. Luvukat ti mo lara i gagas amisik la ik lok gagas nunuan lisingsigaara ren kusu neni noxo lok beleben la noxo lok mamangan.”

<sup>16</sup>La mo leventoonan kapmek diga lok bubua ka lavaorong silok to at lemenemen laasen teren at lavapaase Ibru do ‘Amagedon.’

<sup>17</sup>La laangelo sepsev avanuti ga soli asu lebelemamao at ne Moroa ti lamavangkap, la langsung lavapaase silok ga ravasu boro at loxonin orong, mo ik lok keneng at loogu laplavang; ga lok keretna, “Ira xap ta.” <sup>18</sup>La lavanga ga mam etitit ga vot, la leretepaavat boro vana at laxalibet ga tit la langsung langne silok ga vot. La goxovisi tangne silok kerepmo ga vot, ga ru ka i at luruntudum li at limixin, la mo langne ni ga lok kapmek aleng. <sup>19</sup>La mo lemenemen silok ga epeseves ti lavantun levengkot la mo levenmenemen silok at na lavatbung menemen ga rem utut axap. La ne Moroa ga doma asu laxapmek at limixin to at lemenemen silok, Babilon, la neni ga lox asuusu lebelemamao silok teren ti mo limixin. <sup>20</sup>La levesoxan axap mi lempattavut diga sonao. <sup>21</sup>La langsung larakabu ga vot la lengkos teren ga lok ngan lemparuat la lumumuat teren ga epovo at lavanuet sangaun mi lavalimo leven kilogerem, la ga subu at limixin, la diga paase aksaksa ri ne Moroa mila losongsongot at na lavatakabu ga lok kapmek aleng.

### Latkin Ngarangat

**17** <sup>1</sup>La lara atdi na lavanuti lubungangelo, mo digam tebeng mo lavanuti leventingtigon, ga vot pasa ia la ga lok, “Pen ba i na, la ana lox ase u mi losongsongot silok, ne Moroa naba sep mo latkin ngarangat min, mo it kis saparap laxan taadan solo. <sup>2</sup>Lavaorong silok axap at na lavatbung menemen digang longka i la limixin at na lavatbung menemen diga lok laxakapmek min, i lok ngan ta do diga inin tangtangu mi lavaen.”

<sup>3</sup>La Loroonan Kaala ga vubeles tarak la nom laangelo ga xip kaka ia uto at lamatbin. La nia aga ven lara latkin gat kis to vana at lara lavatpanga sio ga memele aleng la ga ruuna lavanuti lempatlak la

lasangaun lempatkom; la laxanasen kapmek, ni levelinga vupu ri ne Moroa ga umsu at labantuxu ren. <sup>4</sup>Na latkin ga sigaara mi lisingsiga ga memele aleng la ga umsu mi logol eburu mi lengkonuat gamgames, luunun silok ap mo lengkonuat; la leven peal inbun gak lok bok ap mo lisingsigaara ren. Ni gam tebeng lavattingtigon gol ga umsu mi laxangkakapmek teren eburu mi libilinga at loklok teren. <sup>5</sup>La levelinga ga nemen to at lamang teren ketla lavasuun teren goxo xasep. Mo levelinga ga lok keretna,

“Lemenemen silok Babilon, ni lavasuun at loklok ngarangat la neni bok lavatturunen at leveloklok kakapmek axap at na lavatbung menemen.”

<sup>6</sup>La nia aga ven mo latkin ga inin tangtangu mi lada at limixin at ne Moroa, la atnedi bok limixin diga met mila diga nuunu at ne Iesu.

Se nia aga ven i, aga sangu aleng. <sup>7</sup>Ketla laangelo ga lok tia, “Tila u sangu? Ana soxomus lavasuun at nom latkin eburu mi lavatpanga sio, neni it kis pana ren, la i ruuna lavanuti lempatlak teren la lasangaun lempatkom. <sup>8</sup>Mo lavatpanga sio ga rooro gano, kopmen na rooro lingina, ketla melemu naba vasu boro at lemeroon la ba seeve to at lemenemen songsongot. La nedi limixin at na lavatbung menemen, kopmen levenasen atnedi goxok lok keneng at lubuk at lorooro, ga ru ka i at lurutu kaxat at na lavatbung menemen, dinaba sangu aleng do dina ven na lavatpanga sio. Neni ga rooro be, ketla monga neni kopmen na rooro, ketla naba rupot melemu.

<sup>9</sup>Do tara i vara na xasep at na, neni na doma mumu avukar i. Mo lavanuti lempatlak i ru katling lavanuti lengkongkaana la latkin ngarangat it kis to mavana atdi. La mo lavanuti levempatlak i ru katling bok lavanuti lavaorong silok. <sup>10</sup>La lavalimo atdi diga met pam, la legesara atdi mo nga it kis ngan loorong silok; la legesara bok ba vot ketla ba nemen at lentaba levenaleng mun. <sup>11</sup>La lavatpanga sio, mo ga rooro la na nga i met pam, neni loorong silok sepsev avanuan; la neni bok lara atnedi lavanuti lavaorong silok la ni naba seeve.

<sup>12</sup>La mo lasangaun lempatkom nenu ura ven pam i, di ru katling lasangaun lavaorong silok kovisi dina lok ka lixitkis atdi kusu dinam gomgo ri limixin. Ketla nedi eburu mi lavatpanga sio diba lok ka lololos ngan lavaorong silok at lavanna sangaun minit mene. <sup>13</sup>La nedi diba ruuna legesa doxoma mun la diba raba lavatpanga sio mi lololos atdi la diba mumu asu i. <sup>14</sup>La na lavatpanga sio eburu mi lasangaun lavaorong silok diba esep eburu mi Lanasip. La Lanasip eburu minedi neni ga ro xaka di, la nedi bok neni ga soxolik ka di la nedi bok di mumu asu ruturun i, diba sak tup mi na lavatpanga sio eburu mi lasangaun lavaorong silok, mila Lanasip neni Leeme Silok mavana at lavaeme silok axap la neni Loorong Silok mavana at lavaorong silok.”

<sup>15</sup>La nom laangelo ga lok bok tia, “Mo laxantaadan nenu ura ven pam i, la latkin ngarangat it kis saparav i, ni i ru katling limixin boro at levenasen bantuxu, la boro at larabung mixin axap, la boro at levennep silok axap, la boro at levempapaase axap. <sup>16</sup>La mo lavatpanga sio eburu mi lasangaun levempatkom nenu ura ven pam i, nedi diba munepen mi latkin ngarangat. Diba lok kapmek tinotno i la diba ke i nak lok beleben; la diba anan levenbaaxin teren la diba xotos labantuxu ren mi laxao. <sup>17</sup>Diba lox i na mila ne Moroa ira lok pam di xusu dina mumu asu lodoxoma at ne Moroa. Kuren la diba mulus kusu dina raba axap lololos atdi ri lavatpanga sio la neni naba lok lugugu ren min, ba se at levelinga at ne Moroa mumu na levesongsongot naba sorun. <sup>18</sup>La mo latkin ngarangat ura ven i, i ru katling mo lemenemen silok, ni imgomgo ri laramenemen silok at lavaorong silok at na lavatbung menemen.”

### Moroa Ga Sele Utut Lemenemen Babilon

**18** <sup>1</sup>Melemu at nai aga ven lara laangelo vetpes manga ga si boro vana at laxalibet, mi langsung lololos teren; la na lavatbung menemen axap ga xasep mi losoosoo ap mo laangelo. <sup>2</sup>La ni ga xup lolos keretna,

“Lemenemen silok Babilon ira xapmek pam. La na nga ira lok ngan pam lemenemen aulis ti lubanggas mi laxantoonan kapmek; la lavapixa axap di bilingot la di lok kapmek dik lok teren. <sup>3</sup>La limixin boro at levennep silok axap dira in pam laxandan vaen teren, mo i ru katling loklok ti elongka; la lavaorong silok axap at na lavatbung menemen diga elongka min, la nedi limixin diga sesep mi lempanga atdi digap novos aleng mila mo latkin, lebelen ga ngaongao aleng ti mo lempanga diga sesep min.”

<sup>4</sup>La aga ronga laxaka linga vetpes ga si boro vana at laxalibet ga lok, “Limixin tarak. Mina vas kaxat basinge lemenemen Babilon; lavanga mina sok ka toxot tinimi at laxakapmek at limixin at nom lemenemen; la lavanga minang songot eburu minedi mi mo losongsongot nenia aba raba nedi min. <sup>5</sup>Laxakapmek at nom latkin ira ekovana upana at laxalibet i ngan ta lavatkaana, la ne Moroa ira doma asu vam laxakapmek teren. <sup>6</sup>Mina vorang amlong taba i mi laxapmek ngan neni ga lox i rinimi. La mo laxapmek neni ga lox i rinimi, mina vorang i rin na gepura. La mina raba i mi laxadan vaen no i so bobo aleng ti lara neni ga raba nemi min. <sup>7</sup>Mina raba i mi langsung losongsongot aleng la lainbulu silok la naba silok kerekngan ni ga lox asilox i mi leemi asu axa min la lapnovos. La keneng at lebelen ni i lox asilox i xeretna, ‘Nenia loorong tixin; nenia kopmen lavatnaa, la nia xopmen noxo lok bukbulu at lorooro axap tarak.’ <sup>8</sup>Kuren la at legesa aleng mene, ne Moroa naba sev i mi tangsangan tosongsongot; lemeremet, la lainbulu silok la langsung loroxo silok naba

vot parav i. La laxao naba rin asonao i mila Leeme Silok ne Moroa i lolos la neni ba ila mumu loklok teren.” *Lur 19:15; 2 Let 28:9; Sam 10:6; Ais 9:14*

<sup>9</sup>La lavaorong silok at na lavatbung menemen, mo digang longka mo latkin la digak lok laxakapmek eburu min, dinabang teng la dina duudu, mo do dina ven lusuxa ap mo laxao na xotos asonao lemenemen Babilon.

<sup>10</sup>Diba tu ro vaxalom mi lainmarat mumu mo losongsongot, la diba lok, “I lok kapmek aleng. Babilon ira xapmek pam. Ni lemenemen silok la i lolos aleng. Ketla at lavanna sangaun minit mene ira lok kapmek pam.”

<sup>11</sup>La limixin sesep at na lavatbung menemen dibang teng la diba duudu mumu i, mila kopmen teta noxo un kaka bok ba lempanga atdi. <sup>12</sup>I lok ngan leven gol, levesiliva, levenasen uat gamgames, leven peal, levenasen bantamon avukat, lenbantamon memele, levenasen una avukat, levempanga axap limixin di lox i mi la ivori, levenuna mi luunun silok teren, borons, aen, lemparuat nunuan; <sup>13</sup>la sinomon, spais, levempavaxan so mavak, la laxadan i so mavak, la laxadan vaen, la laxadan monok at la olip, la palava avukat eburu mi levempiao, laxanbulumaxao, la laxasipsip, laxanos, lempatkaris, lavasaxaruki, la i ruturun do diga sesep bok mi limixin. La na lempanga axap no xopmen bok ba teta ba un kaka i. <sup>14</sup>La mo limixin sesep diba lok ti mo lemenemen, “Lempanga nunuan taram uga xovox i, ira sonao vam, la lapnovos taram eburu mi lempanga nunuan taram ira xap pam, la u noxo lok ka amlong bok ba i.”

<sup>15</sup>La limixin sesep digap novos aleng ap mo lemenemen, diba tu to vaxalom la diba marat aleng mumu mo losongsongot la dibang teng la dibak saxaanu aleng. <sup>16</sup>La diba lok,

“I lok kapmek aleng. Lememen silok Babilon ira xapmek pam. Ni ga umsu mi levesingsigaara ga lok nunuan aleng la ga memele aleng, la ga vonga logol eburu mi levenuat gamgames la leven peal. <sup>17</sup>La keneng mun at lavanna sangaun minit mo lapnovos silok teren ira sonao la ira xap pam.”

La nedi limixin amgomgo at lempattaaxup la nedi di gugu go xeneng, la nedi bok limixin di lok ka luunun at lugugu ro saparap laras, diba tu to vaxalom, <sup>18</sup>la diba ven lusuxa silok ap mo lemenemen, la dibap kup keretna,

“Goxopmen temenemen at na lavatbung menemen kerekngan na lemenemen silok.”

<sup>19</sup>La diba revi laxakup to mavana at lempatlak atdi la dibang teng la dibak saxaanu, la dibang teng gagalinga xeretna,

“I lok kapmek aleng. Lememen silok Babilon ira xapmek pam. Laxantaaxup ga oso go kusu na lox asu lapnovos silok ti limixin ap mo lemenemen silok. La keneng mun at lavanna sangaun minit la lempanga axap teren ira seeve vam.”

<sup>20</sup>La lara laxaka linga ga lok bok,

“Nemi axap mik lok to vana at laxalibet, mina momo. Nemi limixin at ne Moroa, la luvuttadi vavang la lavaeme vapaase alii, mina sosoro aleng, mila ne Moroa ira vorang taba vam i mi langsung losongsongot mumu lempanga xapmek neni ga lox i rinimi.” *Jer 51:48*

<sup>21</sup>La lara laangelo lolos ga ranga ka lara langsung lavaruat la ga lu arup min to at laras la ga lok keretna,

“Lemenemen silok Babilon; at na mun langas lara ba lu asi mi na lemenemen kerekngan na lavaruat, la kopmen tara noxo vuse ka bok ba i. <sup>22</sup>La teta noxo ronga ka bok ba lerengteng at levengkontaaleng, lerengteng kaka tadi, lerengteng kaatu eburu mi lerengteng at luru keneng teren. La taradi gugu noxo lok bok ba lugugu ren go, la kopmen bok ba tavaruat noxo sax amumus levempiao. <sup>23</sup>Di noxo ven kaka bok ba losoosoo at lababao do xeneng at nom lemenemen, la di noxo ronga bok ba teepang amomo at teloklox epot maxat. La luvuttadi apnovos me go nedu digu lolos aleng keneng at lavatbung menemen axap, la digu sak tup mi lara nep silok axap mumu mun lengkot at lemenemen digak lox i. <sup>24</sup>La na lemenemen Babilon i ruuna ka losongsongot mila digu vuse ka laxanda at lavaeme vapaase alii eburu mi limixin at ne Moroa ro xeneng ap mo lemenemen silok; laaba, lada atnedi axap no limixin digu sep nedu at na lavatbung menemen.” *Ais 24:8, 23:8; Jer 7:34, 25:10, 51:49*

### Ata Emi Asu Mi Ne Moroa

**19** <sup>1</sup>Melemu at nai, aga ronga laxaka linga atnedi buaang limixin to vana at laxalibet, digap kup lolos keretna,

“Ata emi asu mi ne Moroa, neni Leeme Loklox Arooro atdik, la i ruuna lisisixam la lololos teren i silok aleng, <sup>2</sup>mila lodoxoma ren ti raba limixin mi levsongsongot ik mokso aleng la i ruturun. Moroa ira lok li vam lumumuat at latkin ngarangat, mo ga lox abilinga limixin at na lavatbung menemen mi loklok ti elongka. La ne Moroa ira vorang pam laxakapmek ap mo latkin ga sev amet lavasaxaruki at ne Moroa.”

<sup>3</sup>La digap kup bok,

“Ata emi asu mi ne Moroa. Neni ga sele utut lemenemen Babilon la lusuxa ren i urut uto vana la mo laxao noxo xap.” *Ais 34:10*

<sup>4</sup>La mo legepu sangaun mi lavanuet loxongkulao amgomgo la lavanuet levempanga rooro digu xis tiktikbu mi lempatgulom atdi la digu lotu parap ne Moroa. La digu lok,

“I ruturun, ata emi asu mi ne Moroa.”

<sup>5</sup>La nia aga ronga laxaka linga ga laa boro at loxonin orong at ne Moroa la ga lok keretna,

“Ata emi asu mi ne Moroa. Nemi lavasaxaruki ren, la nemi mi lok ngangao ren la nemi limixin gamasa la nemi limixin silok, mina emi asu mi ne Moroa.” *Sam 115:13, 134:1*

### Loklox Epot At Lanasip

<sup>6</sup>La aga ronga laxaka linga at limixin buaang ga ninni ngan ladan silok i sesen lolos la ga lok ngan bok leretepaavat boro vana at laxalibet i tit; la mo laxaka linga ga ravasu xeretna,

“Ata emi asu mi ne Moroa, mila Leeme Silok atdik ne Moroa, neni i silok aleng la naba nemen amisik ngan lamgomgo at lempanga axap. <sup>7</sup>Ata momo la ata sosoro la ata emi asu min, mila laaleng loklox epot at Lanasip mo ia vot ta la loono rin mo nga ira gagas li vam i. <sup>8</sup>La ni ira lok ka vam labantamon avukat in bun aleng, in tanan la im games aleng.”

Na labantamon bunbun i ru katling leveloklok nunuan at limixin at ne Moroa.

<sup>9</sup>La mo laangelo ga lok tia, “Una malagan i na, ‘Luvukat tinedi limixin ne Moroa ba xup ka di ri leluxa at loklox epot at Lanasip.”

La ni ga lok bok tia, “Anai, ni levelinga ruturun boro at ne Moroa.”

<sup>10</sup>Nia aga ronga i na la aga xis tiktikbu mi luvatgulom tarak to saparap luxangkedek teren kusu ana lotu parav i, ketla ni ga lok tia, “Nemen gat uta lotu parav ia. Nenia lasaxaruki mun at ne Moroa kerekngan nenu eburu mi luvutnetam, mo mim tebeng levelinga ruturun at ne Iesu. Una lotu parap ne Moroa. Mo levelinga ruturun ne Iesu ga tong asu i, ni lavasuun at levempavang at luvuttadi vapaase asu levelinga.”

### Laradi Ruturun Gat Kis At Lavaros Bunbun

<sup>11</sup>La nia aga ven laxalibet ga rem suang la aga ven lara lavaros bunbun. La mo laradi gat kis go mavana ren, laasen teren, ne Luruturun. Lodoxoma ren ik mokso la kerepmo neni laradi ing tonga linga la ik paxaru kaxat levenesep. <sup>12</sup>Luxatli ren i soosoo ngan laxao i ngangao, la ni ga xua buaang lempatbungorong to at lavatlak teren. La lara laasen ik lok teren la kopmen teta naklen lavasuun teren, ketla neni xusuk mun iklen i. <sup>13</sup>La mo lavanga singsigaara ren i umsu mi lada la laasen ap mo laradi ne ‘Levelinga at ne Moroa.’ <sup>14</sup>La limixin esep boro vana at laxalibet di mumu asu i, dit kis at lemparos bunbun la di sigaara mi levesingsiga i nunuan la in bun aleng la i dadat. <sup>15</sup>Lavarise sengsen i sixisu boro at lungusno ren kusu ri sak tup minedi limixin at levennep silok. La neni naba lok tatao di ngan lamgomgo atnedi, la loklok tatao ren ba lolos aleng. Neni naba lox asuusu lebelemamao silok at ne Moroa i lolos aleng. <sup>16</sup>La lara langas linga ik lok to at lisingsigaara ren la to bok at laaon teren; nom langas linga i lok keretna, “Loorong Silok mavana at lavaorong silok la Leeme Silok mavana at lavaeme silok.”

<sup>17</sup>La nia aga ven lara laangelo ga tu ro mavana at laxangking. La ni ga xup lolos ti lavapixa axap dip tava de vana at lamavangkap keretna,

“Ude nimi la mina vot buru ri langsung leluxa at ne Moroa. <sup>18</sup>Ude nimi la mina anan levenbaaxin at lavaorong silok la luvuttadi amgomgo at limixin esep, la levenbaaxin at luvuttadi lolos, la levenbaaxin at lemparos eburu minedi limixin dit kis teren, la levenbaaxin atnedi limixin sepmus eburu mi limixin saksaxaruki, la atnedi bok limixin gamasa la loxongkulao silok.”

<sup>19</sup>La aga ven bok lavatpanga sio eburu mi lavaorong silok at na lavatbung menemen eburu mi limixin esep atdi, diga vot eburu xusu dina esep eburu mi nom laradi gat kis at lavaros bunbun la limixin esep teren. <sup>20</sup>La nedi diga ranga alis lavatpanga sio eburu mi leeme vapaase alii xaxarang, mo gak lok lempanga sangsangu ri sar asoogong limixin kusu dina lox asilok laasen at lavatpanga sio. Ni ga lok mo lempanga sangsangu xusu na bala arup buaang nedi limixin la diga ruuna ka loklok katling at lavatpanga sio la diga lotu parap lavatpoovo vanga ren. La diga lu arup mi lavatpanga sio la leeme vapaase alii xaxarang, move duga rooro, ro at lemet kao, mo i tos amisik mi lasalpa. <sup>21</sup>La mo lavarise sepep ga sixisu boro at lungusno ap mo lara gat kis at lavaros bunbun, la ga sep kutkut axap limixin esep at lavatpanga sio. La lavapixa axap diga anan tino at levenbaaxin atdi.

#### Satan Gak Lok At Loxokoxo

**20** <sup>1</sup>La nia aga ven lara laangelo ga si boro vana at laxalibet, neni gam tebeng lengki at lemeroon la gam tebeng bok lavaros sen silok. <sup>2</sup>La mo laangelo ga ranga alis lavattulaava la ga xoxo i kusu na nemen kuren at legesa abin sangsangaun kobot (1000) levenmaares. Mo lavattulaava ga nemen ganoxa, neni ne Devel la laasen bok teren ne Satan. <sup>3</sup>La mo laangelo ga lu arup min ukopok at lemeroon, la ni ga vipe lavatban la gam lut pe avarang lumusaragu ap mo lemeroon. La ne Satan nabak lok go at legesa abin sangsangaun kobot (1000) levenmaares la ap mo levenaleng neni noxo bala arup bok ba limixin at lavatbung menemen se at laxavaxap ap mo levenmaares. Melemu at nom neni naba sepmus at lentaba levenaleng mene.

<sup>4</sup>La nia aga ven lengkonin at lavaorong silok, la nedi limixin digat kis teren, diga ruuna lololos kusu dina ila mumu loklok at limixin. La aga ven bok leventoonan atnedi limixin la limixin petpes diga ra korop lengkaka atdi mila diga tong asu lunuunu atdi keneng at ne Iesu, la diga nuunu bok at levelinga at ne Moroa. At lorooro atdi di goxo lotu parap lavatpanga sio la lavatpoovo vanga ren la di goxo lok ka loklok katling at lavatpanga sio to at lenmang atdi koplavengikngan di. Diga roo xat amlong la nedi eburu mi ne Karisito digam gomgo ri limixin at legesa abin sangsangaun kobot (1000) levenmaares. <sup>5</sup>La nedi limixin petpes diga met pam, kopmen di goxo roo xat amlong se at laxavaxap ap mo

legesa abin sangsangaun kobot (1000) levenmaares. Anai, ni laxakatu kaxat amlong avot at labarongan. <sup>6</sup>Naba lox avukat aleng tinedi na lavaanat soxolik at ne Moroa, diba nemen ap mo laxakatu kaxat amlong avot. Di noxo suma lanmet sepsev agepura ketla diba lok ka lugugu ngan lavamaasa ri ne Moroa la ri ne Karisito; la nedi eburu mi ne Karisito dibam gomgo ri limixin at legesa abin sangsangaun kobot (1000) levenmaares.

### Lanmet At Ne Satan

<sup>7</sup>Melemu ap mo legesa abin sangsangaun kobot (1000) levenmaares na xap, Moroa naba soxomus asu ne Satan boro at loxokoxo. <sup>8</sup>La ni naba vasu ri bala limixin at lengkot axap at na lavatbung menemen. La nedi lubungmixin me Gok la Magok, Satan naba lok bubua ka di kusu ri leesep, la luutus atdi naba umsu aleng kerekngan laxangkaneng to loxon. <sup>9</sup>Dinabat pas boro at lengkot axap la dinaba rupot to at mo lemenemen silok at ne Moroa i vavara aleng tin, la dinaba ru xangkan i. Ketla laxao naba si boro vana at laxalibet la naba xotos axap di. <sup>10</sup>La mo laradi babala arup, ne Satan, Moroa naba lu arup min uto at lemet kao at lasalpa; mo lemet kao lavatpanga sio eburu mi laradi vapaase alii xaxarang dubak lox e, la go nedi lavantun dinaba ruuna ka losongsongot silok at levenaleng kangking la kanimin la kopmen taxavaxap teren.

### Laaleng Ete Silok

<sup>11</sup>La nia aga ven langsgangan loxonin orong bunbun la mo Laradi gat kis teren; la lavatkangka eburu mi laxalibet duga sixiro basinge i la duga sonao nga. <sup>12</sup>La aga ven nedi diga met pam, limixin silok la limixin gamasa, diga tu ro melango at loxonin orong at ne Moroa. Lentaba lempatbuk mo ga repalas. La lara lubuk ap mo levenbuk diga suang i, ni lubuk at lorooro. La ne Moroa ga ila mumu loklok atnedi limixin, la mo leveloklok atdi gak lok ap mo levenbuk. <sup>13</sup>La nedi limixin diga met to at laras la nedi bok limixin diga met la diga nemen to Edesa, la limixin axap diga met, diga tu ro melango at ne Moroa la neni ga ila mumu loklok atdi la diga lok ka luunun ga epovo mi leveloklok digara lok pam i. <sup>14</sup>La ne Moroa ga lu arup axap tino nga mi lanmet eburu mi lenep Edesa uto at lemet kao. Mo lemet kao, ni lanmet sepsev agepura. <sup>15</sup>La nedi limixin levenasen atdi goxok lok at lubuk at lorooro, Moroa ga lu arup bok midi uto at lemet kao.

### Laxalibet Maxat Mi Lavatkangka Maxat

**21** <sup>1</sup>La nia aga ven laxalibet maxat la lavatkangka maxat, mila laxalibet avot mi lavatkangka avot ga xap la laras ga sonao. <sup>2</sup>La aga ven lemenemen melemelengan, ni lemenemen maxat Jerusalem, ga



si boro vana at laxalibet boro at ne Moroa, ni ga nganang ngan latkin i gagas kusu na epot maxat at latlok teren. <sup>3</sup>La aga ronga luxupkup silok boro at loxonin orong at ne Moroa ga lok, “Mina ven ba i, lemenemen aulis at ne Moroa monga ira si vam la neni nak lok eburu mi limixin. La ne Moroa naba nemen eburu minedi, la nedi diba lok ngan limixin teren, la ni naba nemen ngan ne Moroa atdi. <sup>4</sup>Neni naba ves kepe lengkabili dan basinge lengkatli atnedi. La limixin kopmen di noxo met bok ba, la di noxo saxaanu bok ba kopla dinang teng la di noxo songot bok ba; mila lavatkangka avot ga sonao vam eburu mi lempanga axap gak lok keneng teren.”

<sup>5</sup>La mo Laradi gat kis at loxot kitkis teren ga lok, “Monga ana lox amaxat lempanga axap.” La ni ga lok bok tia xeretna, “Una malagan i na mila na levelinga i ruturun la i epovo do limixin dina nuunu ren.”

<sup>6</sup>La ni ga lok bok, “Ara lox empampana vam lugugu rak; nenia Lurutu Kaxat la Lumumupit. Aba vaxain nedi limixin do di minu mi mo ladan i puvut su boro at lavatturunen at ladan at lorooro la kopmen di noxo un i. <sup>7</sup>Dola nege na vas asi lololos at laxakapmek, neni naba ruuna na leveloklox anarong keretna; nenia aba nemen ngan ne Moroa ren la neni naba nemen ngan ne nuruk. <sup>8</sup>Ketla nedi limixin makmarat la nedi dina sok tixirixes lunuunu atdi, la nedi dina lok laxakapmek silok la nedi dina sev amet parang limixin, la nedi dina lok loklok kakapmek maxamang at lixitkis epot, la nedi luvuttadi sak, la nedi dina lotu parap levemppoovo moroa, nedi limixin babala; nedi axap na, nenia anaba lu arup midi uto xeneng at lemet kao i ngangao mi lasalpa. Na losongsongot, ni lanmet sepsev agepura.”

### Lemenemen Maxat Jerusalem

<sup>9</sup>La lara at nom lavanuti lubungangelo mo gam tebeng lavanuti lempattingtigon ga umsu mi lavanuti levesongsongot, ni ga lok tia, “Ude u, la ana lox ase u mi mo loono maxat, neni latkin ti Lanasip.” <sup>10</sup>La Loroonan Kaala ga vubeles tarak, la nom laangelo ga xip kaka ia uto at lakaana silok la ga lox ase ia mi lemenemen melemelengan Jerusalem, mo ga si boro vana at laxalibet la boro at ne Moroa. <sup>11</sup>La mo lemenemen gan tanan aleng mi lisisixam at ne Moroa. Mo lemenemen ga soosoo aleng ngan lengkonuat gamgames, luunun teren i urut aleng, i ngan jespa, i gamgames la i xasep aleng. <sup>12</sup>La langsung larangas uat matmatkun ga baalom aleng upana la ga tu xangkan mo lemenemen silok Jerusalem; la lasangaun mi legepura laramusaragu gak lok ap mo larangas uat, la lasangaun mi legepura lubung angelo ga lok tatao mo laramusaragu, legesa angelo at legesa musaragu. La ap mo laramusaragu levenasen atnedi lasangaun mi legepura larabibinat at limixin boro Israel gak lok atdi, leges asen at legesa musaragu. <sup>13</sup>Lavantun laramusaragu gak lok to meso, lavantun levenmusaragu gak lok to mero,

lavantun laramusaragu gak lok to mexun, la lavantun laramusaragu gak lok to mesi. <sup>14</sup>La mo langas uat gat kis mavana ap mo lasangaun legepura larauat kis, la levenasen atnedi lasangaun mi legepura luvuttadi vavang at Lanasip gak lok teren.

<sup>15</sup>La mo laangelo ga paase tia, ni ga ruuna losoxovo i gol, kusu na soxovo mo lemenemen silok eburu mi laramusaragu ren la larangas uat teren.

<sup>16</sup>Lababaalom at larangas uat ap mo lemenemen silok mi lerepteplas teren la lababaalom upana ukopok ga epovo mun. La nom lababaalom teren ga epovo at legepu abin sangsangaun kobot mi lavalimo sangaun kobot (2500) kilomita. <sup>17</sup>La ni ga soxovo bok lerepteplas ap mo larangas uat la ga epovo at lavantun sangaun mi legepu asongo. Laangelo ga soxovo mo lemenemen kerekngan limixin di soxovo lemenemen. <sup>18</sup>Langas uat ap mo lemenemen diga lox i mi la Jespa, la mo lemenemen silok diga lox i mi logol tinotno, la ga xasep ngan lagalas. <sup>19</sup>La mo larauat kis at larangas uat diga xovox i mi laxanasen uat axap i gamgames. Lara avot neni la Jespa; lara mumu neni la Sapai; lara sev avantun neni la Aget; la lara sev avanuet neni la Emeral.

<sup>20</sup>Lara sev avalimo neni la Onikis; lara sev avanna neni la Kanelien; lara sev avanuti neni la Krisolait; lara sev avanan neni la Beril; la lara sev avasik neni la Topas; la lara sev asangaun, neni la Kirisoperes; la lara sev asangaun mi legesara, neni la Jasin, la lara sev asangaun mi legepura, neni la Emetis. <sup>21</sup>La mo lasangaun mi legepura laramusaragu, nedi lasangaun legepura leven peal la at legetgesa musaragu diga lox i mi legesa peal mun, la langas lom ap mo lemenemen ga gol tinotno la ga xasep ngan lagalas.

<sup>22</sup>La nia a goxo ven toogu laplavang go xeneng at nom lemenemen silok, mila ne Moroa xa Leeme Silok neni i lolos aleng la nedu eburu mi Lanasip duk lox amisik ap mo lemenemen silok; kuren la limixin dixok pakes ti toogu kusu dina lotu parap ne Moroa mi Lanasip go. <sup>23</sup>La mo lemenemen silok ixok pakes ti laxangking mi lagaaling kusu duna soosoo axasev i. Lisisixam at ne Moroa im taba amisik losoosoo at levenaleng axap, la Lanasip ni lababao ren.

<sup>24</sup>La limixin axap at na lavatbung menemen diba nemen at nom losoosoo, mo i soosoo su boro ap mo lemenemen silok. La lavaorong silok axap at na lavatbung menemen diba xip beles levenapnovos atdi ukeneng teren.

<sup>25</sup>La laramusaragu ap mo lemenemen silok noxo tu vipipe, la noxopmen bok ba taxanimin go. <sup>26</sup>La limixin at lavatbung menemen diba xip beles mi levenapnovos atdi uto xeneng ap mo lemenemen silok. <sup>27</sup>Ketla kopmen tinotno taxakapmek naba beles keneng teren, nedi dik lok lengkot mamangan kopla di xaxarang, di noxo vubeles teren. Nedi xusuk mene levenasen atdi ik lok to at lubuk at lorooro at Lanasip diba beles keneng teren.

#### Ladan Tooro

**22** <sup>1</sup>La laangelo ga lox ase ia mi ladan at lorooro ga xasep aleng. La ga puvut su boro at loxot kitkis at ne Moroa la Lanasip; <sup>2</sup>la ga

sesen to xantubu at langas lom at lemenemen silok. La to meo la meo at na ladan, luuna at lороoro i tu go la keneng at legesa maares mo luuna i pisik, i epovo at lasangaun mi legepu aleng, la i pisik gesara at legetgesa gaaling. Lempavaxan una ren dik lok ka i ri lox aroo limixin at lavatbung menemen. <sup>3</sup>La mo lasaxaek ik lok mavana at na lavatbung menemen noxok lox ap moi lemenemen silok. Loxonin orong at ne Moroa eburu mi Lanasip naba nemen go la lavasaxaruki ren diba lotu parav i. <sup>4</sup>La diba epen etang mi ne Moroa, la laasen teren nabak lok to at lenmang atdi. <sup>5</sup>La noxopmen bok ba taxanimin, la limixin di noxok pakes bok ba ri taxasep at lababao xopla laxangking, mila Leeme Silok ne Moroa neni naba lok ngan laxasep tidi, la dinaba ruuna lixitkis silok ti lok tatao limixin la dinaba nemen amisik kuren, la kopmen taxavaxap teren.

<sup>6</sup>La laangelo ga lok tia, “Na levelinga i ruturun amet la i epovo do limixin dina nuunu ren. La Leeme Silok, ne Moroa im taba Loroonan Kaala ren ti lavaeme vapaase alii ren la ni ga riki laangelo ren kusu na lox ase lavasaxaruki ren mi lempanga salai naba vot soso.”

#### Iesu Mo Naba Vot

<sup>7</sup>Iesu ga lok keretna, “Mina ronga i na, anaba vot soso mun. Luvukat tinedi di mumu asu levempapaase alii at na lubuk.”

<sup>8</sup>Nenia ne Jon; aga ronga na levelinga la aga ven na lempanga, la aga xis tiktikbu mi luvatgulom tarak ti lotu parap laangelo mo ga lox ase ia mi na lempanga. <sup>9</sup>Ketla neni ga lok tia, “Nemen uta lotu parav ia. Nenia mun lasaxaruki at ne Moroa kerekngan u la luvutnetam, nedi lavaeme vapaase alii la nedi bok ding tonga res at levelinga at na lubuk. Una lotu parap kusuk ne Moroa.”

<sup>10</sup>La ni ga lok tia, “Nemen uta lipe levelinga vapaase alii at na lubuk, mila loxonaleng monga i auret kusu na levelinga na sorun. <sup>11</sup>La nedi dik lok laxapmek, una ke nedi dinak lok laxapmek; la nedi loklok atdi i bilinga, dina nemen kuren; la nedi dik lok leveloklok i nunuan, dina lox epasum i mi leveloklok i nunuan; la nedi di ruuna loklok i dadat, dina nemen kuren.”

<sup>12</sup>La ne Iesu ga lok, “Mina ronga ia. Nenia anabamlong soso mun! Nia aba xip ka luunun eburu minia, kusu anaba raba limixin getgesara mi luunun naba epovo mi lempanga salai diga lox i. <sup>13</sup>Nenia Lamgomgo la Laxavaxap, Lurutu Kaxat mi Lumumupit.

<sup>14</sup>Luvukat tinedi dira gos adadat pam levesingsiga atdi, kusu lороoro atdi naba epovo xusu dina anan at lempeven una boro at luuna at lороoro, la dina beles keneng at levenngas povolo uto at lemenemen silok. <sup>15</sup>Ketla limixin kakapmek la lavaun sak, la nedi limixin diga lok laxakapmek maxamang at lixitkis epot la limixin sepsev amet tadi, la nedi di lotu parap lempoovo vanga, la nedi bok di vavara aleng i xusu

dina paase babala la dik lox amisix i; nedi axap na di noxo vubeles to xeneng ap mo lemenemen silok.

<sup>16</sup>Nenia ne Iesu. Ara riki vam laangelo rak tinemi limixin at lotu xusu ni na vaase axasep nimi mi na levelinga. Nenia lavatturunen la livisik li at ne Devit; la nenia lentian i soosoo aleng. <sup>17</sup>Loroonan Kaala eburu mi latkin epot maxat du lok keretna, ‘Ude nimi.’ La nedi di ronga i na, dina lok bok keretna, ‘Ude nimi.’ Do nege i minu, i epovo do neni na rupot, la nege i vara ladan tooro, neni na lok ka i, mila kopmen tuunun teren.”

<sup>18</sup>Nenia ne Jon, a vaase aronga nemi axap mira ronga vam na lempapaase alii at na lubuk; do tara na tong abeles parang tengkot ukeneng at na lubuk, Moroa naba raba i mi nom levesongsongot ik lok keneng at na lubuk. <sup>19</sup>La do tara na lok pes tempanga basinge na lempapaase alii at na lubuk, Moroa naba lok kepe levempeven una ren to at luuna at lorooro la neni noxo nemen bok ba ro xeneng at lemenemen melemelengan at ne Moroa. Mo luuna la mo lemenemen, ik lok at na lubuk.

<sup>20</sup>La neni mo i paase aru i na, i lok keretna, “I ruturun aleng; nenia mo anaba vot soso nga.”

I ruturun. Ude u, Leeme Silok ne Iesu!

<sup>21</sup>Letaba nabalamu at Leeme Silok ne Iesu nak lox eburu mi limixin at ne Moroa. I ruturun.